

李文忠公朋僚函稿

李文忠公朋僚函稿篇目

桐城吳汝綸編輯

卷第十四

正月三日復喬鶴儕河帥

同治十一年

正日二十一日復王補帆中丞

同治十一年

正月二十六日復曾相

同治十一年

二月十四日復英西林宮保

同治十一年

二月十六日唁曾劄剛栗誠公子

同治十一年

二月二十三日復梅筱巖方伯

同治十一年

二月二十五日致曾劄剛栗誠公子

同治十一年

二月二十六日復王補帆中丞

同治十一年

三月望日復英西林宮保

同治十一年

三月十六日復丁稚璜宮保

同治十一年

三月二十一日致曾劼剛公子

同治十一年

三月二十三日復邵汴生中丞

同治十一年

三月二十八日復何筱宋制軍

同治十一年

四月二十七日復何筱宋制軍

同治十一年

五月十六日復彭雪琴宮保

同治十一年

五月十七日復吳仲仙制軍

同治十一年

六月朔日復王補帆中丞

同治十一年

六月十七日復何筱宋制軍

同治十一年

六月十八日復四品卿銜何子永

同治十一年

六月二十二日復邵汴生中丞

同治十一年

七月十九日復何筱宋制軍

同治十一年

七月二十二日復鮑花曇中丞

同治十一年

七月二十四日復許星叔閣讀學

同治十一年

七月二十九日致劉子務廉訪

同治十一年

八月五日復王補帆中丞

同治十一年

八月九日復邵汴生中丞

同治十一年

八月十一日復丁稚璜宮保

同治十一年

八月十三日復何筱宋制軍

同治十一年

八月二十一日復何筱宋制軍

同治十一年

八月二十六日復邵汴生中丞

同治十一年

重陽日復王補帆中丞

同治十一年

九月十一日復丁雨生中丞

同治十一年

九月十二日復袁筱塢少詹

同治十一年

九月二十四日復邵汴生中丞

同治十一年

十月十日復何筱宋制軍

同治十一年

十一月四日復邵汴生中丞

同治十一年

十一月十一日復張振軒制軍

同治十一年

十一月十五日復孫竹堂觀察

同治十一年

十二月六日復孫竹堂觀察

同治十一年

十二月九日復曾候

同治十一年

十二月二十日復孫竹堂觀察

同治十一年

十二月二十二日復彭雪琴宮保

同治十一年

李文忠公朋僚函稿卷第十四篇目終

李文忠公朋僚函稿卷第十四

桐城吳汝綸編輯

正月三日復喬鶴儕河帥

同治十一年

侯家林決口要工適值新舊交替地方與河員互相觀望稍有遲誤尊慮撥銀購料春水已生仍須中輟不得已而請緩惟東南各省皆懼沮河不堵黃汎盛漲南趨諸湖運道農田爲害過巨頃聞 廷旨飭東省籌款年內興工已撥銀三十萬兩派近河州縣趕購埽料薛守福辰赴涉甯設局催收似購料尙可集事工程責之河員能否同時並舉殊深系念或謂侯家林決口仍係西面洪川口黎同莊一帶橫穿趙王河東下之溜須先堵趙王河舊口以撤正流其地名孟家莊寬一百三十餘丈次堵沮河新口以截漫流其地卽侯家林寬八十一丈深一丈四五尺若通盤籌算與其捍沮河而大溜轉趨安戴穿運路寬寬者難治不如捍趙王河而大溜得

歸張秋穿運路窄窄者易治未知於實在形勢果相合否尊函云侯家林並不得爲決口黃水捲地漫野而來全將民堰汕去縱堵合而上下民堰處處可以過水須將此一百二十里民埝普行加倍乃爲可恃是此項工費浩大已難倉猝程功若再議堵趙王河舊口更恐無此財力矣鴻章自五年剿捻周歷河上見黃水日益南走該處地勢北高南下曾謂一過沮河越南旺分水口遂無治法今不幸其言中矣吾丈處事勢竭蹶之際獨任挽瀾障川之責心力交瘁可想而知春融尙須親臨督催否調甫中丞以畿境工賑兼營頭緒紛冗月內清理稍定當卽委員接署計入 覲後履新亦不遠也

正月二十一日復王補帆中丞

採購賑米四萬石承商飭胡雪巖在滬定買三萬臺灣再辦一萬開春購齊派丁守嘉璋押運萬年清伏波安瀾三船各一百五十匹馬力計每批

可裝一萬數千石若二月上旬放洋中旬可至輪船喫水過深恐不能入大沽口已令天津丁道多備剝船派員在大沽紫竹林兩處分投接收所雇商船如係外洋輪船夾板較爲迅速但須隨到隨交過期要加給住日船價如沿海民船又慮春初阻風遲滯蓋籌定臻妥速盼系曷任津郡嗷集飢民數萬迫待春賑各屬亦望及時散放閩米到後自可於舟次受兌無須囤倉祇求米船早到斷不任其守候進口在海運既到之後誠不免擠碰延擱之虞矣調甫月杪交卸藩篆計展 覲履新陶交初夏和翁由北而南自須七八月間也粵東應元書院章程法良意美造就必多辛未發軔已得狀頭及詞林五人足徵教澤之遠官自官而家自家名論不刊月俸七百合措置裕如能自理財方能理 國家之財亮節清風尤欽佩無地三年例請如力有不足竟不必請吳仲翁爲言入蜀兩年閩累未清此固中外所共諒耳官造輪船清冊閱悉津關養船經費尙未籌定容弟



三月到津後與陳道詳酌再行預陳前雪帆閣部有停造輪船之奏未知  
執事如何籌復總署緘商官輪招商雇買以資周轉想已并達尊處若不  
停造或備運漕或交商賃亦是流通之法惟聞華商以官輪船裝運無多  
駕駛不善未敢傾重貲以受牽制現飭津滬各關道集議尙難遽定妥策  
滬局係雇用洋匠由我主政行止尙易操權左帥初定閩局合同似有欲  
罷不能之勢或儘議定製造若干隻工竣卽行截止閩船創自左公滬船  
創議曾相鄙人早知不足禦侮徒添糜費今已成事而欲善其後不亦難  
乎畿疆年內外得雪數次民氣尙屬恬和惟窪地未涸春麥未能補種展  
轉溝壑不知凡幾抱疚無涯

正月二十六日復曾相

募人出洋未盡事宜一摺十九附遞奉交總署議奏馮卓如函留鄭守極  
爲懇切玉軒尙無稟覆滬局不可無玉軒鴻章言之屢矣前因品蓮病劇

不得已徇陳沈孫諸君之請商令暫代正初子敬來省詢知品蓮近狀漸瘳冀可緩至鴻章抵京後再商替人鄭守願否姑聽其便卓如於此事探討已久惟務外而不甚精於內局務主持七年尙一日離鄭不得其情可知徐壽外才雖欠深入精通高出流輩卓如肯表而出之否蓋局員無不畏其疑偏也興造輪船兵船實自強之一策惟中國政體官與民內與外均難合一慮其始必不能善於後是以鴻章於同治四五年勸議鐵廠時左公已先議造船鄙意未敢附和但主仿造槍礮軍火謂可自我發而收之也卽不備於水而尙有備於陸也茲聞滬造船已六載成器成效不過如此前興之而後毀之此信之而彼疑之及今吾師與左公尙存異議已多再數年十數年後更當何如財欲其費效欲其緩百年或有與洋製爭勝之日今世不欲多費財又不欲緩收效士大夫恆情皆然豈獨雪帆雪翁此奏亦采中外衆論而出之也仲仙之去薊巖之告幼丹之辭皆爲船

局補帆又屢來書詢官輪處置之法亟亟求去之卽易疆吏百而所見則一人孰不視官爲傳舍有憂國如家視遠如近者乎可悲也師門本創議造船之人自須力持定見但有貝之財無貝之才不獨遠遜西洋抑實不如日本日本蓋自其君主持而臣民一心併力則財與才日生而不窮中土則一二外臣持之朝議夕遷早作晚輟固不敢量其所終極也租賃輪船一節自是經久推廣至計津關委員林士志與廣幫衆商雇搭洋船者議呈九條照鈔呈覽據稱公湊本銀三十萬公舉總商承攬由官稽查或請發公款若干照股均攤生息已緘致上海廣建各幫妥議仲復履任後就巨商反覆籌計或有定局鴻章並屬子敬隨時函商仲復無論何項委員經手必須各關道就近商辦敬乞卓裁省三交卸銘營未盡妥洽蓋臣入手亦太慌亂王孝鳳又從旁加功致干嚴譴褫職尙是小事省三自爲計則得矣蓋臣日求加餉加運費徒滋饒舌將來如何支久月間往

復兩緘錄呈鈞鑒頃又接蓋臣上元日來信仍請另增親兵二營額餉另籌運費並稱左帥進攻河州太子寺各軍連戰不利後路被擾各路諸軍退撤全數出山賊騎已至鞏昌會甯等處安定危急等語似此前敵軍情大變可慮之至季老志在盡瘁鴻章自度精力日曠文武將佐亦少艱貞耐苦之人設有緩急將若之何吾師以天下爲任曾豫籌及否轉運局借撥挖河築壩銀十萬兩目前暫可周轉惟盼及早歸款耳金眉生性喜多事其言不可盡聽去秋洪水橫流三事大夫莫知我艱姑采其鹽務捐引勸募棉衣二策若非函丈在江休戚相關彼說固不能行憐其窮老附請開復原銜卽屬其輶晦守默自遠嫌謗嗣後迭有函牘或批不准或置不俞稍示疏遠之意仲復子山皆不肯會銜極有斟酌其強勸吳曉帆芳之說似是訛傳南波十萬元會勸浙捐二君實有其事鴻章斷不爲其所惑江浙似亦無信從之者若竟橫挑是非吾師應置勿論我輩當共含容而

已史繩之放安肅道尙難成行子序年丈幫分已由鄂彙寄賤辰何敢言  
老尊意懇懇殊令愧悚龐省山分任河務亦佳

二月十四日復英西林宮保

昨得昌期書湘鄉侯相忽於二月四日仙逝老成彫謝中外震驚弟與患  
難相依最久艱難時局賴共支持噩耗乍傳憂悻欲絕我公同舟擊誼嗜  
懷 君國情緒可知急報計已至京十一二日邸鈔未見明文尙不知誰  
是替人定亦煞費躊躇 兩宮正議吉禮聞此應若何悼念也大亂時人  
才輩出今四方漸平日益枯落夜闌依斗輒用惓然

二月十六日唁曾劼剛栗誠公子

十二夜得黃軍門馳報吾師頭暈復發調養數日已瘥乃於二月初四日  
棋罷散步園亭俟爾薨逝驚悻悲痛神魂飛越四日於茲初猶疑信恍惚  
或者雖過復蘇不敢遽相信弔今閱邸鈔遺疏至京 兩宮震悼逾恆特

諡文正追贈太傅一切飾終恩禮均極周備而吾師果已死矣不可復生矣天乎天乎奈之何哉弟等仁孝性成遽遭大事慘痛哀迫之狀略可想見鴻章從游幾三十年嘗謂在諸門人中受知最早最深亦最親切往歲津門送別見師容貌雖漸蒼悴體氣食量均未甚減謂當永享遐齡嗣遇金陵人至詳問起居云自去冬巡閱回署精神更覺健旺前接正中旬來書娓娓千言毫無意興衰竭之處何圖撒手竟去非獨鴻章意料所不及弟等亦倉猝豫備之不及也附身附棺等事定已周全賜祭設弔有日否遠羈職守無翼可飛何時始得拜瞻几筵一大慟耳錢調甫適於十一日抵京函稱內廷是日得報輟朝三日百官相顧失色海內外士民呼號巷哭者蓋不知凡幾也每憶吾師於軍事屯困時常恐死不得所及賊平而官居又慮晚節不終茲結局如此哀榮易名如此優異亦不負平生之志惟吾弟等孤露人間何以善慰慈幃克謀堂構鴻章等勉

承遺緒何以支持 國計仰報恩知此則所共早作夜思而惕厲不能自  
已者矣以後喪塋大端悉賴經營周妥前奉手書以師母大人足疾已愈  
而筋骨輭弱扶杖倚人而行病弱之餘何堪經此悲愴務望吾弟強抑哀  
思曲體親心曷任系念禱切之至師門文稿奏疏日記哀然成帙望及時  
收集酌請名手選校鴻章當任梨棗之役行述年譜並祈早爲編訂轉寄  
史館諸君撮敘入傳鄙意方擬作疏表揚繼見 諭旨大致周浹四海公  
論在人 九重自爲知己似無煩贅言矣

二月二十三日復梅筱巖方伯

十二夜接黃軍門初五日辰刻馳書驚悉師相暈疾忽發遽爾僊逝初以  
吾師近來精力雖減體氣並未甚衰何至一去不回十六日接閱邸鈔乃  
知遺疏果已至京當卽泐函致唁劄剛昆仲並畧商後事計得預聞十九  
日復奉初六日六百里來函並鈔摺稿及師相絕筆數語悲愴曷勝 聖

主感念忠良 恩禮優渥什倍於官倭諸相昔胡文忠歿後師相爲表揚  
一疏膾炙人口鴻章受知最深又後死之責奚敢以不文辭惟伏讀 詔  
旨似已無義不搜一代元良 九重知己師相助德名位冠絕百僚卻非  
文忠可比深恐以贅言觸忌且鴻章於咸豐八年臘月始復從師於豫章  
以前節略日久無可考證亦懼貽不詳不慎之譏昨臧屬劄剛采輯行述  
年譜哀迫之際慮難速成幕府子密諸君能否於暇時編查摺稿撮敘事  
實大略鈔寄俾有據依卽遲數月亦可補上尊意如以爲然乞代懇催爲  
幸現所宜亟請 加恩者子孫銜名已令筱宋制軍查奏他人自不可提  
越彼帥於師門恩誼極隆無不竭力表章鴻章已函商酌辦並將師相平  
日甚盼栗誠科第之脫絨告調甫在京便爲述及矣至安徽江西湖北三  
省均應請建專祠英劉各帥與家兄等當先後疏請望執事便中商詢之  
師相善全始終以平昔侍坐之論揣測高深似可毫無遺憾惟 國事重



大四方多故藐躬固無能獨立諸君亦勉費支持江南北大亂初平伏莽甚多內憂外患時覺岌岌新閣下襄贊彼竹諸帥宏此遠謨慎守成法以弼丕基侯家林決口聞將堵合清江河工尙祈妥議

二月二十五日致曾劄剛栗誠公子

前勅唁函計已達覽連日迭接南中寅友來書並由小巖方伯寄到師門遺疏及日記絕筆戰兢臨履之意終身不懈神明湛然殆聖賢仙佛中人追念典型彌增愴慕聞已請九世叔來甯主持一切似須月餘乃可趕到計奉 恩旨後應擇期弔奠鴻章遠羈官守未獲匍匐往從執紼之役私衷罪歎特令史副將濟源兼程南馳代申祭告謹備聯幃並賻儀二千兩極知清風亮節平生一介必嚴豈敢漫以相溷惟受知如鴻章之深且久竊祿最厚若不稍助大事亦太覲顏乞勿以恆情親之卽賜營存爲幸飾終 恩禮備極優渥其略有請增者各地方大吏當事之責惟吾師數十

年堅苦卓絕行詣尋常或摹繪不出鴻章隨侍患難略窺底蘊分應專疏  
上陳自聞信後心緒懊惱萬狀追尋前事恍惚如隔世筆拙思鈍又苦不  
能自達其所欲言現擬丐求前後幕府諸君各據寫見聞隨筆割記見示  
當從容削稿乞付史館不乞他 恩亦可免世俗之譏嘲矣鴻章受 國  
重恩家有衰親常祝吾師康強壽考分此重寄而今已矣前望後顧愴然  
雪涕如何可支此又非心喪築室所能自遣者沅丈久不通問與世齟齬  
未知尙有出山之日否希代道念瀛眷南歸時似宜暫寓湘省師母大人  
近體若何務祈設法寬慰

致錢子密吏部薛叔耘副貢

師相之變實出意外聞信至今恍惚驚悼如夢如迷諸公左右追隨更不  
知如何傷感遺疏想由密兄代擬語意若自己出豈獨有若之似夫子  
朝廷震悼 恩禮至優亦如人意之所欲出小子尙復何言惟師門平生

功業志行精神氣象外人不能盡知我輩從游最久相契夙深反復籌思未可終嘿弟忝竊高位聞道雖早而離道太遠文筆弱劣不能自達其所欲言前函懇彼嚴方伯轉求諸兄撮敘大略見示昔師相表揚胡文忠一疏其時先令鴻章起草乃大加刪潤而出之茲不才老而愈荒構思數日竟至不敢下筆惟有仰乞同事諸君子就近查考前後事實及吾師平日意趣功力之所在不惜分條逐件一一割記剋期惠寄俾集衆思庶無遺憾師相與弟交深而情過親不欲再乞 加恩致貽世俗標榜之譏但助史官耳目所不逮想尊意必以爲然耘弟手筆極好如密翁無暇務懇及時代撰感盼曷極筱帥計已履任 內意頗以兩江難得替人惟賴彼翁努力耳

二月二十六日復王補帆中丞

萬年清安瀾兩船運米進口皆因喫水太深不能逕達紫竹林已由天津

丁道派員前往剝運上海采買之米聞須由嘉湖各縣倉借撥周折需時  
洋行輪船夾板因多裝米赴粵不肯載運北口未免居奇日來尙無閩米  
續至之報各屬指望分發春賑焦急曷任海運漕船到津已有數十隻將  
來剝收擁擠勢所必至丁守亦早至津計與丁道等妥速提催也津河水  
未甚涸飢民待哺日長但冀春季暢晴高地麥收必旺惟地氣太濕今歲  
恐仍有水災耳曾文正公之變殊出意外遠近同悲東南控馭難得替人  
筱宋暫權其威望才略未知能否勝任宋雪翁停止輪船之議前由曾相  
鈔咨並另復總署函稿謹照鈔呈覽雖未及覆奏老成議論實爲思慮深  
長想總署樞垣亦未敢遽置可否租賣華商一節自是變通經久良方敝  
處早分飭各關道體察核議尙未具覆此事應由上海辦起南洋無熟悉  
情形肯任大事之人則築室道謀顧慮必多閩廠原定五年造船十六隻  
現已逾限似尙未如數造齊日意格等必曲爲解說與洋人共事既有成

議在先未易翻悔於後如何定局如何善後務祈通盤籌畫妥晰敷陳便中鈔稿見示爲幸大沽口內至津二百餘里水常淺涸大船多不能行昨據津關陳道等議以閩廠鑄海新船丈尺分寸可期合用未知船器礮位良楫若何求飭便中北駛查閱再行定議已另咨商

三月望日復英西林宮保

兩江替人難得筱翁以蘇撫權攝本係舊章或謂長江水師需人整飭請調彭雪翁管領其事雪翁老病避世未必再出而東南關鍵尙不係此鄙人忝管北門時虞隕越惟祝鄉邦遺黎得所依恃耳曾文正公克復皖省各郡縣遺愛在人筱宋請於立功地方建祠自併皖城在內應否由執事專疏於安慶立祠之處伏希卓裁

三月十六日復丁稚璜宮保

侯林之役喬帥膠執河工錮習遽請緩辦江南慮其波及遂有堵順清潞

舊河之議需費鉅而禦水於下游竊疑迂遠寡效明公霆震颶舉掃除積弊爲曲突徙薪之謀不及五旬官堤民埵次第完繕定大難決大疑是何神勇凡事必有十分把握而后定議則亦無可辦之事老於事者徒媿媿獨未權其利害輕重耳聞公之風當共感奮也統計費帑若干如何籌湊規畫章程必有大異尋常蹊徑者前後奏章望飭鈔咨以擴見聞爲幸東關加抽洋藥釐金一節鄙意重在一律加收非必欲解津應用承示東省添練馬隊水師及協撥各款多指釐金自應併解司庫迺蒙軫念畿疆災祲允爲勻借二萬金俾濟賑需厚誼公忠實出望外鴻章上巳日由保赴津沿途察勘河間以東水勢漸涸惟文安大城滄靜青津各屬仍一片汪洋雖極力疏消而海河至大沽百餘里內節節沙淤灘阻風潮頂托欲下不下恐至四月尙未盡消伏秋大雨時行哀此子遺豈有生計現賴閩省助米四萬石分給各處暫濟口食執事於河費竭蹶之際尙蒙盡力推解

噓枯起瘠功德匪淺曾文正公久同患難遽悲永訣前望後顧獨立蒼茫  
兩江替人屬望我公幸勿堅意引退四方多故老成彫謝必賴大力擔當  
也省三早經抵里勇退求代自干 嚴譴蒙 恩曲念前功或亦動忍增  
益之道銘軍半撤回徐祇要蘇省勉力供支冀稍紓將伯之呼矣

三月二十一日致曾劄剛公子

前派史副將賁致薄賻吾弟守不家於喪之訓堅卻賻賻第思師門素無  
蓄積卽蒙 賞銀兩計歸塋卜地一切禮文周備需費尤多若尋常知交  
自概屏絕如鴻章兄弟等誼同骨肉仍不敢遽遺多金亦慮有累清德此  
幾幾者豈尙弗蒙鑒納耶澄侯世叔到甯後能久住否秋涼再扶櫬南行  
較爲平穩何彼帥疏已甚曲盡咸豐九年以前事實稍略師相一生艱苦  
磨折實在斯時聞屬次青擬稿必能詳贍將來乞鈔寄一讀兄正令摯甫  
代擬疏草謙讓未遑神道碑非異人任當與摯甫商辦自愧不文無以表

章先師盛烈私衷負疚多矣 廷議令彭雪翁復出治水師未知能強起否東南大局尙不專在此一事也

三月二十三日復邵汴生中丞

保陽傾蓋暢慰闊悰比審順抵青門新猷丕煥河州前敵潰退幸季帥尙能力持投誠之脫雖未盡確藉以整軍緩敵大局無虞執事益得從容布置譚李所部分併整頓邊防計稍周密曹蓋臣駐乾訓練近日將士較融洽否屢懇敝處添解運費乃可入甘無如敝軍出入款項厯有定額奚從籌增巨款聞調甫中丞在京時曾爲當軸言之亦以暫行留陝協防爲是台端斟酌情勢能否暫留渠在陝則戰守當可得力赴甘則主客似難相合兵單餉薄亦屬無濟於事弟去冬覆奏但就 廷諭易將之意約略言之相距過遠礙難懸揣定議務祈大才就近審度機宜詳示一切是所企幸湘鄉師相中風暴薨遠近震悼東南失此長城後患方多殊可危慮瑞



芝師昨亦作古老成彫謝惟盼諸君子同心戮力翊贊聖明盤錯乃以別利器關中雄勝之區鎮撫招徠及時展布尙可有爲欽仰曷極

三月二十八日復何筱宋制軍

昨奉三月三日手示敬審前旂遄發吉座允升兩江任大責重而兵事餉事洋務鹽務及漕河吏治諸端皆有成章可循我公大含細入厚重謹嚴逐漸經營必當日有起色來書謙抑惕厲自視歆然彌深欽佩調甫自都過津述及當軸以難得替人專委執事以宦跡久在皖鄂與湘淮將帥氣誼素投緩急可恃弟等肝衡當世賢才實亦無逾我公者似是常局非暫攝也大疏表揚文正師鉅細兼賅遠邇傳誦鄙意初欲略述所知心煩筆劣又前後事實苦無記載恐貽挂漏之譏嗣接讀佳文更不煩言而解聞有請次青撰述吾師生平者或能補我輩所未逮弟尙徘徊埃之朝廷篤念蓋臣固已無微不至子孫加恩一節應候尊處查覆日內尙未見

綸音殊爲盼系淮鹽督淮運司兩織造傳辦各件似與長蘆略同江南雖較富庶所需二百萬豈能咄嗟立辦若先籌辦一半可稍塞責不獨財力不給亦無許多機匠丁稚翁堵塞侯家林決口則順清河等工可緩似不妨變通待時江省出入皆有定款入無可增則源未易開出亦未便增則流尙須節且須從大端節省至加撥運司京餉十萬早遲或可騰挪耳銘軍調回徐州原請由師相酌量撤留唐提督甫經到防尙未議及將來應否酌裁幾營暫留幾營俟秋後察商妥辦振軒與省三俊侯至好該軍情形亦熟計其展覲回淮當在夏秋弟再與之面商令其莅任隨時請示籌辦何如俊侯奉諱先經奏留陝營嗣同徐固請終制弟曾咨請師相疏留以資熟手似尙未及核辦此次金陵進謁時果否議及是否由尊處附奏便中示知內意欲彭雪帥再莅水師肯出而任事否日本使者柳原等瞬卽來津欲悔前約未免失信容當相機駁辦法使卽來修約英

人亦不無覬覦今年洋務或有饒舌處以靜鎮冀可從容就理敝幕專賴  
淺筱南襄理通商函牘前接伊信不願遠行朗軒過此商請尊處留筱南  
襄助而請孫君文川赴津幫忙似甚妥洽乞兄以鄙人求助之誠轉告兩  
君子借箸一籌弟自去冬回保迄今五閱月總署來信數什件皆置未復  
亦可見其疏慵矣省齋到津奉 批旨令其 陛見弟以賑務緊要請先  
赴任昨已往保陽接篆金眉生條陳多不可行迭經批駁並屬其杜門韜  
晦前代籌賑款請復頭銜彼復多事可謂不知進退者矣

浴佛日復黃子壽太史

蓮池引水種荷活潑生意足徵小試經綸殊深嚮往三世兄痰旣下盡宿  
疾可望獨除可喜之至心泉病甚似將去官孝鳳過保想係回京其誣蟻  
丁兩生痛刺劉省三頗傷忠厚院長而遙持 國計雖非出位但似涉門  
戶之爭所謂僞君子也左帥並不能聽用其言受降緩兵究將如何結局

曹叢臣偏裨羣材去一王家珍又用孫恕何能有爲曹將萬人幸與西路全局無甚關係耳日本議約甫定忽又派人來津商改狡黠可惡陳子敬尙在假中弟尙未與該使接晤惟該國上下一心敝衣西土機器槍礮戰艦鐵路事事取法英美後必爲中國肘腋之患積弱至此而強鄰日逼我將何術以處之有崑山王學博於吳亂時避地香港陷身異域輯鐫海蜀言一冊因人轉呈鈔奉台覽可作奇書觀也

四月二十七日復何筱宋制軍

三月二十八日肅緘計早達到昨奉三月二十七日惠書敬承一一現造兵船雖未能卽云禦侮而規模已具門徑已開數十百年中國禦侮必兼賴之季高制軍大聲疾呼不可裁撤鄙人斷無異詞將來興造貨船再籌招商雇用未爲晚也昨據吳道稟批答咨報未審有當蓋懷否募選子弟出洋肄習一事文正師持議甚堅及吾身敢不卒業荔秋純甫二君洵遠

志之士恐因師相偃去意興索然望兄時時策勵之去冬致書師門以蒞秋垂老投荒必須預籌替人茲總署復慮及此敝處左顧右盼無此遠到之器似須於粵東選覓乞公早爲留意純甫熟悉洋情宜得志正體直者贊助則流弊較少倭使柳原等迭經嚴詞駁斥聞其祇請本國再定進止南洋派赴京修約者何人

五月十六日復彭雪琴宮保

黃鶴樓頭一別忽逾四年聞結茆江干鍵戶謝客馳慕莫名春間錢調甫展 觀回津具述 樞廷文相以執事威望血性足繼吾師 朝廷優詔復起正爲天下蒼生額手旋得江楚探信知大雲擁轡聞 命卽行極深欣盼九年冬叩送師門於天津精神固差飲食起居均甚強健嘗謂當後我而死孰意金陵凶耗轉瞬卽來中外皆詫爲奇福自爲計亦得矣如國事何如我輩何劄剛昆仲扶櫬西上計我兄必迎祭於湖口撫柏大慟

患難平生從此永訣古今傷心人同此懷抱也弟顧影自危既不能遺世  
獨立惟祝同舟舊雨奮翅溟池合力支拄迺讀啓程疏稿及來函宛轉哀  
鳴殆無意於斯世未免大失所望竊謂力疾巡江何不可力疾趨 朝再  
取進止中原倘定時局日艱非得忠貞幹濟數人布列寰寓恐有江河日  
下之勢厚庵深固閉拒誓不再出我公又如此頽唐師相未了心事誰與  
擔當耶昌歧興致亦甚衰颯長江難得替人兄當有以慰其意焉長夏扁  
舟冒暑馳驅曷勝惓惓北上時乞過我

五月十七日復吳仲仙制軍

春夏江水甚漲想係蜀中雨澤應時黔苗掃穴擒渠善後不外留兵招墾  
川楚援師或可漸次裁減惟裁營須清積欠減餉須助墾本仍賴川楚協  
力稍示限制亦費蓋籌隴回就撫實不敢恃爲定局目前供支恐尙有增  
無減省三拂衣遠行所部諉諸莫知誰何之人弟初不便強拂其意竟成

無底之累將來即可裁撤亦多隱患奈何

六月朔日復王補帆中丞

賑米早經收竣分運各屬起枯回生功德匪淺丁守等航海購解備極妥速循案請獎愧未足以酬勞直屬高田尙多麥收頗稔民氣稍蘇秋禾均甚暢茂日來陰雨間作但祝霖潦不至津郡積水甫退若盛漲加數尺卽虞偏災焦系曷任輪船有不可中止之勢季丹兩公大聲疾呼鄙人豈復能異議月前覆疏 留中已先鈔稿密咨矣鎮海船器具精堅礮位亦新津河大沽出入似尙合式俟秋中駛來自當留用現籌洋藥加釐以資薪費屆時容再覆陳彭雪翁力疾巡江不能北上筱翁表揚文正師一疏似已賅括可無贅言日本遣使續求改約經弟督飭陳孫二道反覆駁辨給以覆文回國據稱須該國往西洋修改新約事竣再來華互換約在明年春夏間無論果否必待換約後妥商通融也法使熱夫類已至烟臺不日

由津赴京似議修約章未可尅期竣事

中伏日致張廉卿中翰

文正師薨逝後感悼不能去懷前屬薛叔耘吳摯甫趙惠甫諸君詳查事實各抒所見撰擬一篇正欲采輯入告聞史館已就江皖楚三疏編敘傳稿勢已無及又 兩宮近日 召對殊稀凡陳奏要件不免留擱以是徘徊不果劼剛世弟諄屬爲撰神道碑鴻章事冗筆拙向未學爲古文碑誌尤非高古嚴重創言造句不足以稱其體詢之存之摯甫未敢率應皆以此事推閣下叔耘書亦道及之吾兄於師門風義最篤伏祈椽筆代作尅日寄交感泐無似

六月十七日復何筱宋制軍

陳麗秋容純甫月前來津一晤忽忽返棹亦將總署商辦替人之說約略告知麗秋顧盼自雄謂必可如約往返弟遂不便深問總署之意蓋欲籌



備於平時執事擬詢黎召民俾舉所知務望留意物色爲幸如有其人隨時詳示黎陳兩君所議南洋諸島收之可爲我用誠有遠見兩生中丞曾有此說惟新開各埠似已分隸各國如香港尙在粵境華官未能過問推此遠之海外若明爲條教彼族必起而相爭若陰與羈縻宵小或藉爲口實嘉秋謂俟兵輪船出洋後以巡歷爲名往覘虛實再行定奪似尙合宜目前可無須建言也

六月十八日復四品卿銜何子永

四海之大庶政之繁幾患無人湘鄉師相忽又僊去前望後顧觸緒增悲願撫綏之責在疆吏而振奮之本在朝廷今  沖聖吉禮將備  宮府內外竭蹶供支之不遑何暇計及民生之休戚遇有興舉悉下部議徒令猾吏姦司留難需索而名實皆虧紀綱日隳踵此而行亂機將兆豈疏遠所能爲力即百湘鄉在外庸有濟耶日來  西太后不豫輟朝數旬振軒

朗軒等近光無日引對人員積壓更多近侍咸以親政爲諱若聖德未近於光明臨馭萬幾亦非易言此則目前可憂之大者鴻章自治分內應辦之事動多牽掣日不遑給曷敢馳驚高遠中外責望過分大概蹈空常談惟有量力踏實做去在直一日不稍釀亂而已去秋大水脅惑無措之時適金眉生以鹽捐棉衣二策相餉不以人廢言而於災民有實濟故深德之嗣見條議支離乖舛痛加批斥或遂置不答似尙不惡而嚴來指隱約及此尙恐相知不真耳向來用人聽言不甚涉成見也

六月二十二日復邵汴生中丞

河州撫事似已就緒東鄉西甯頑梗之徒或漸以兵威脅之嚮化左帥何時移駐蘭垣穆帥一軍勢將奚往澄邵零匪已否殲除甘事一日不清陝邊固難保無事也蓋臣聞有足疾與敝處函牘從未提及初七日來緘尙有將弁勇丁均屬帖服之語而尊示初六夜武毅右營戕官譁潰二百餘

人盡臣親率馬隊往追時日畧同情事迥異是盡臣之匿不以告抑尊處之傳聞未確耶頃已據探報情形批詢查復又接筱塢兄初九來信謂盡臣已將潰勇招撫百餘人餘仍散在各處續後想布置妥帖矣該軍兵將不甚愜洽弟早有所聞時深焦系盡臣用人太雜偏聽多疑近又託病不常接見營哨自更易於搖惑惟留陝銘軍實係百戰勁旅營規向極整肅器械尤稱精利省三付託非人弟亦將就畫諾以致進退狼狽後悔何及敵部稍得力之將領散處四方或另當一面當時本猝不及商今已定之局再求更易則軍心愈滋搖惑必須審慎躊躇出於萬無一失不至一誤再誤而後可也省三斷無再視秦師之理筱塢慷慨自任論其智勇歷練必能勝任不知於現在各將弁恩信相孚否稽臺果有替人否執事同譚至好見聞確近乞妥酌密示爲幸尊意既以陝中空虛已極斷不能少此一軍將來若必易將似須與秦人上下聯絡而威信又足以統攝銘營方

爲合宜敝處左右籌思一時實難得妥人蓋臣肅州之行尙易作爲罷論  
惟其交替則恐不易平妥彼翁必確有把握卽請我兄於言事之便略露  
端倪弟如蒙下問容當直抒所見也事關大局彼此同之不敢不慎至直  
省西大道現甚平靜行旅無驚瀛眷何時出都已飭各地方官妥爲照料  
護送請釋厯懷書此適接蓋臣十一日函告潰勇已分別招回懲辦暫可  
無事惟病足愈劇似有退志耳

七月十九日復何筱宋制軍

筱南於洋務公牘實能曲折赴題總署諸公有知之者惟在敝處襄事十  
年未得一枝之栖今窮且老不便強之遠行渠與世亦落寞寡合江南才  
藪恐遂沈淪念之惻然滬局馮卓如鄭玉軒於洋務機器已有心得玉軒  
精細篤實尤未易才念其資勞漸深密薦堪備關道之選桐雲曾任實缺  
久思得一進步自文正師去後未免旁皇卻願是以附保在內稍慰其意

而未滿其願望也然都中人來毀譽似尙參半或前在閩另有招忌之處  
桐雲似不自知耳景公清望本減肝案諒可速結雪帥體弱多病能否北  
上將來位置殊難昌歧稍失寬柔經此大懲不免退志亦殊費調停矣熱  
使來意專欲保護教友遇事必多糾纏本月十四日見文沈諸公求面  
覲皇上呈遞國書經文相再三駁難乃謂崇公在洋似已許之其實崇但  
云不敢作主回國再議耳語罷欲索一回信想尙略有波瀾

七月二十二日復鮑花曇中丞

筱軒請代銘軍在省三已退蓋臣已去之後相距過遠無從預商且該軍  
歸江南調遣亦非弟所能專主也泮生中丞昨又函告本月初五日以後  
曹軍亦已無事武毅軍僅一哨潰逃當卽追回長武銘軍尙係宿將不至  
生變易將本非易事以省三擇將自代尙如此齟齬若由鄙人於數千里  
外另遣一人未必卽能熨帖泮生輕信謠言弟非 廷旨飭商未敢越俎

度曹軍尙可不至決裂耳

七月二十四日復許星叔閣讀學

畿疆災歉之後麥收稍豐各屬迭報雙歧不敢壅於上聞乃遂啓茲多  
口河州撫局已定左帥聞移節蘭垣則河西聲援較壯伊犁卽能接收未  
知兵威能自固否此事饒舌固無已時

七月二十九日致劉子務廉訪

省三跌宕自喜掉頭不顧初保曹克忠自代鴻章素與曹漠不相識又遠  
在數千里外奚能另立異議省三又飛函囑催速往因不得已覆奏照辦  
詎知曹君甫到卽與決裂省三必後悔鄙人亦未始不後悔誤聽而誤用  
之也營勇非標兵可比況將士從我輩十餘年一旦棄於不知誰何之手  
遇此粗率無禮之人焉有不猜疑日積變故橫生者迨潰叛事起中外遠  
近皆曰此淮軍也此銘營也我輩苦戰滅賊功可不爭名可不居而坐視

所部得潰叛之名 朝廷卽不責問鄉里卽不訕笑百戰相從之士卒卽不怨恨於心安乎否乎於義忍乎否乎吾弟與省三向以血性男子自命世俗之榮辱得失無足動心惟於此事有始無終清夜捫衷或稍不免遺憾耳邵汴生中丞迭函屬請吾弟馳往代將彼固驚疑過甚兄猶徘徊未決曹蓋臣昨有函至方極表白其調劑拊循之苦心陝營來人所云仍未盡符合不知尊處所聞有異詞否蓋臣屬代乞病離營兄覆書未允仍勸其力疾視師聯絡官民容爲徐籌替人並緘復邵中丞勿信謠惑妥爲調停以安目前不意本日奉 寄諭邵撫已一奏再奏致勞 聖廑若不速籌妥人替代則此軍一壞於曹克忠之手再壞於穆圖善之手至壞極時猶必歸咎於省三嫁禍於鄙人我輩原非畏事畏禍者亦獨何能任若輩顛倒簸弄耶及吾與諸君子尙在乃甘爲袖手旁觀倖災樂禍亦何忍而出此 廷旨旣令撤回安插苟得其人非甚難辦之事吾弟起家行間威

惠廉勤軍士無不感服不獨鄙人與淮部上下所共信卽秦晉豫東諸帥無不共信而共望之省三雖被曹王譖毀久而自明若吾弟投袂而起爲省三一洒斯恥爲銘軍作大結束然後長揖歸田身名俱泰魂夢俱安豈僅鄙人感佩高誼已哉日內擬先具疏奏請飭催執事兼程來直面商機宜再將撤回安插辦理情形陸續具陳事關淮軍大局幸勿稍有濡滯推諉是所切禱鄙意可將全部帶回周家口訓練次第妥籌撤留數月必能辦定堂上年高定省尙易兼顧若必因私廢公或致銘營釀出他變其責備亦不得專在鄙人請吾弟三思速駕爲盼

八月五日復王補帆中丞

船政覆疏總署雖經議准而於停造拖罾艇船開採煤鐵不敢置議尙是敷衍目前之計數十年後當更何如前項均非甚難甚費之事但須得人經理耳法使熱福理到京求面遞國書總署未便允行果有不准遞則天



津前案難結之說該使昨過此又與切實開導似稍轉圜然其國書不願由總署轉遞終是未了之事將來親政時各國必合詞籲懇殊費調停竹堂赴京襄辦修約熱使深穩異常一時未能議及農部必欲試行河運而黃河正溜近已南移六十里之安山入濟河東趨八里廟已成支流斷港所謂逆天時恃地利難乎其爲糧道矣閩志蒙已覓寄感感劉增魯伯陽係貪鄙小人前因軍務倥偬誤加驅遣卽次第斥逐劉增吞公而慣拜老師尤深嫉之嗣與陳子奉訟爭後絕未見過亦不給咨其何時捐指廣東有無其事尙希查察蘇州保案僅係升用知府所控卽使得實應併劾罷以清仕途

八月九日復邵汴生中丞

二十八日復臧次日欽奉密諭一道乃知先已勅穆將軍赴乾察辦深恐枝節愈生軍心益滋搖惑而廷旨既令撤回安插不但被塢兄本

係生手難遽撤回且舍穆請袁既無以處春巖亦未必邀 俞允籌思至再自不如逕令劉子務前往接統情理俱順呼應較靈卽春巖可勿深怪而執事可無過慮矣因於初二日覆陳初六日已奉 俞旨初三日又接七月二十一日手示敬承一一子務廉正謹慎最爲可靠在銘軍亦最久最熟此軍若歸彼翁而令子務相助雖強迫必不再出若令物還原主隆以體貌責以大義或可強起一行弟已專函勸駕並屬西林中丞專員敦促俟其到津商定機宜再行奉聞彼塢處未便先復晤時乞將鄙意略爲婉達實緣 內意先已差池非弟敢中變也春巖能不遽至乾俾盡臣暫可安心坐鎮似更穩洽蓋臣左右少正人春巖尤甚軍中以樸實爲上需索賄賂鮮不敗事者茲將覆疏並所奉 密寄鈔呈乞祕存勿以示人恐稍洩漏

八月十一日復丁稚璜宮保

本屆黃水竟未灌運自緣大溜全趨安山以南八里廟一帶分流愈形淺澁聞河坡水雖暫可倒漾浮送聞江北各起漕船次第挽入而蘇松各幫尙滯口外節逾白露恐非陸運不能抵臨運河七級等處高仰過甚卽有坡水亦難暢行今歲如此來歲若何農部不問天時地利必執試行河運之說當事者雖欲行險僥倖勢有不能執事爲東道主人將何策以謀其後耶通壩收漕弊端日出周福皆觀察過譚厯厯如繪海運剝船與東漕受累相等畢東河前輩已補倉場或能挽回一二法使資國書求 覲甚力總署與敵處多方開導似可暫緩西洋事例國書必須面遞不能轉陳親政無論早遲各國將羣起曉諭有難以口舌爭者修約尙未開辦更非剋期可定

八月十三日復何筱宋制軍

雪琴兄此番整頓水師雷霆迅厲使人重足而立其不滿於昌期代請開

缺昌期本覺無顏可無須自陳矣未知代者何人較勝於前否雪翁計日抵京病體不願作官若假以管領水師虛銜必不樂居且令當局難以措手法國熱使昨赴烟臺接眷過晤談及請  覲一節弟與切實剖辨似可暫緩惟所資國書二件不肯由總署轉遞其在京有不准面遞則天津結案礙難辦理之說意存要挾究亦勢難轉圜各使皆欲俟  親政後合詞籲求或者徘徊以待此事終費口舌也修約尙未開議蔡道緒守前已過津計有一二年耽擱赫德在此議商稅單報單章程大致更定至於管禿唇焦業咨總署核辦江省協款增多百萬以上羅掘殊費心力年穀順成釐課能少旺否揚臺前借七萬諭令撥還彌增感愧曹蓋臣將士不治屢生事端汴翁密請敕處妥籌不得已請  旨飭調劉子務盛藻復起覲師此軍擬將撤回陸續裁併俟子務往秦後徐圖整理卽能辦到亦需鉅款畿境入秋後雨水暴發各河漫溢雖晴久退速窪區又多災傷賑卹力窮

祇增坎戾曉蓮糧艘頃始到津黃水竟已南趨來年河運更無辦法振軒  
比當抵吳應接不暇李勉林廉能血性忠於文正尤爲可敬當卽札調回  
直但坐補原缺亦需時耳

八月二十一日復何筱宋制軍

昌歧來函以雪帥另有嫌怨吹毛索瘢退志甚切得執事委婉調停俾賦  
遂初殊爲幸事惟長江一缺轄境太長師船零布約束斷難整齊前文正  
師議立營制時鴻章慮無善後之策曾以爲言文正與雪琴始意僅以安  
插立功將弁十數年後亦恐與綠營流弊略同昌歧固未免寬柔代者豈  
必能起色雪翁向與厚庵不洽議者怪其偏激今觀此舉殆亦甚焉子和  
前輩計過邗江果晤談否 覲賞似尙從容但慮後難爲繼筱南聞入蘇  
幕振軒亦稍得助伯敷已三函敦請未知肯遠遊否昨得總署密函法使  
緩議國書商請修約照鈔呈覽各國請 覲之說前詢俄使似緩至 親

政以後再行會商伊犁云非欲據祗爲榮侯兵力一無可恃恐交城後不能保守此亦實情無辭可開輪船請獎疏稿妥協之至祈卽繕發桐雲前商五號大兵船須委馬鎮復震管帶馬鎮文武兼資度越諸將頃來密稟所陳窒礙各節似多中綏究應如何籌辦謹將原件封呈管核船政練兵煞有關係未便匿不以告尙希大才酌奪隨時留意馬鎮矯矯自好桐雲雖倚重之而彼亦不甚佩服卓儒偏復更難相信渠不日來津當再與商榷也江北漕糧已儘數截留直屬順屬賑撫惟黃水南趨張秋以北運河日形淤墊曉蓮視爲畏途情非得已來年須煩盡畫耳弟莅直兩年未及展覲思值大婚慶典都門咫尺不敢不請或須成行

八月二十六日復邵汴生中丞

銘軍非子務復出難再整頓調甫杏農筱塢諸公與鄙見適皆符合我兄慮衷采訪誠心推轂初九日之奏又不約而同內意必無疑貳曩聞盡

臣與春巖共事積不相能是以六月間武毅右營之潰春翁卽據探報上陳想必張皇其詞自爲地步乃有察看撤留之密旨竟未令敝處及執事與聞若非尊處先露端倪幾至攪壞大局連接春帥來書得續旨後更易師期迨奉初五日密寄似亦徘徊卻顧矣目下究抵何處帶兵若干蓋臣久駐青門已否回乾均深懸系弟前復盡臣書允爲徐圖替人此後絕未通問但旣在省或有傳聞子務中秋接弟書次日卽奉英中丞轉行廷旨雖親老多病不得不慷慨就道據報二十五日自籍啓程九月中下旬當抵津門晤商機宜必令治裝西進子務未到之先恐不免小有謠惑尙祈設法維持調護隨時示知

重陽日復王補帆中丞

和帥冬初計可履新前過津暢談似於洋務少所涉歷船政更無定見惟屬其勿與幼丹過爲立異鎮海到津試驗船礮均甚精堅陸把總精悍可

用日內卽 奏留差遣呂文經既帶安瀾赴粵應勿置議彭雪翁查閱長  
江水師整頓極嚴昨見過時謂必不就官職甫抵京卽奉署少司馬想終  
須辭卻也琴軒服闋來此擬將北上補官早遲則未可知振軒仲良英英  
競爽皆匡時令器兩生起復有期聞無意出山確否洋務大致平靖

九月十一日復丁兩生中丞

得八月十二日手書莊楷雄文足徵進德之猛胸中積鬱一發之於詩古  
文詞辦事久則閱歷透必多沈著痛快之處非文人空談所及僕每恨今  
世學人侈詡著述毫無實濟誤盡蒼生又自恨久羈塵網貽不學之誚未  
免矯枉過正來示謂天下大局日難一日人才風尚日壞一日二語實已  
勘破機關不才名位忝居衆人之上苟且枝梧隨俗浮湛勢亦無所建白  
乃知湘鄉晚年常存去之若浼之思非得已也吾黨如補帆調甫振軒仲  
良聯翩而起不可謂非才僅比於鄉黨自好之流孰是憂 國如家視遠



若近者其餘更不可知執事當官時常鬱鬱不自得迨被瑯琊一擊意緒更灰彼以院長數言事先毀閣下次剝省三皆若有宿衅深怨無他爲左帥報私嫌實則左公與鄙人晚更相親豪傑固異於庸鄙也用行舍藏就執事所處地步不得不爾屆期函請當道代陳病狀此卽是無故實之故實不必多文此間雖無成案而所見甚廣文沈今之秉鈞旣深知閣下吏治洋務冠絕流輩當被羣議而起之不然則口譽而腹誹他人言之有似僭妄也法使挾國書請 覲初以津案難結爲辭及過津相晤兄以數語折之其議已寢修約尙無端緒三聯票本條約所有復加申明無可禁遏電線由海至滬似將盛行中土若竟改驛遞爲電信土車爲鐵路庶足相持聞此議者尠不咋舌吾謂百數十年後舍是莫由公其深思之前上輪船疏以裁沿海師船試開煤鐵礦總署已不敢置議夢夢可知漢回乞師於英未聞有密助軍械之說俄人堅拒伊犁我軍萬難遠役非開鐵路則

新疆甘隴無轉運之法卽無戰守之方俄窺西陲英未必不垂涎滇蜀但自開煤鐵礦與火車路則萬國縮伏三軍必皆踴躍否則日蹙之勢也品蓮迭疏密薦已擢九江關道春帆甫接辦機器局徐圖位置

九月十二日復袁後場少詹

前奉七月十一日手教緣無發動之信沈吟未報嗣奉密諭已令穆將軍移赴邠乾察酌撤留仍飭鴻章妥籌如何撤回安插等因事經中變勢出兩歧誠恐激生他變籌思至再若另請執事接統旣顯違前 旨之意必大招穆帥之怨且就撤回安插四字立論閣下現處地位亦不相宜祇有逕請 勅下劉子務廉訪復起視師不但駕輕就熟操縱自如以原營還原將穆帥或不起而相爭亦勿庸深怪也蓋臣已齟齬於前春嚴亦豈能整飭於後連接其蘭州來書下問方略其情可知誠不願以淮軍之名再任顛倒疵謬區區苦衷知蒙鑒原特以跡近食言正增悚愧昨又奉八月

二十二日惠示忠懇惻怛之懷博大光明之概欽佩無量前此往返籌商時原欲主人印證一語以免日後雌黃汴翁似亦殷殷推轂皆不料事機之多變耳子務函報八月二十五日起程月內當可抵津據稱病體未盡痊復老親不忍久離或因乾軍習氣日非有面質疑難之處卽甘軍日有起色素中無須留鎮亦必須到營整練數月使復舊觀乃可徐議撤回否則新舊雜糅衆志未齊難免以出關遣散之詞搖惑生事非計之善者也蓋臣八月杪西安來信求退更切子務未到鄙人未便遽允亦暫不作會我兄塵懷大局乞於會晤通候時勸其少安毋躁拊循將士照舊操防一日不交卸則當獨任其責耳子務入秦後一切糧餉轉運務懇大才一力代籌周妥彼必虛衷受教至鄙人之於執事累世交厚同澤情深尙何有些子疑猜耶

九月二十四日復邵汴生中丞

乾州長武各營稟報潘萬才馬隊迎擊潰勇收撫人馬五日餘徐邦道馬隊亦收降人馬各百餘蓋臣自帶七營行隊赴寶鳳一帶攔截如潰軍由秦州東趨或得一當散軍計口授食餉有定額各營俘獲苦無安置弟已批令該將領巡稟尊處轉飭各州縣資遣遞解出境此等逋寇游勇勿惜小費分送回籍以免內訌弟九年夏間剿散北山逃勇卽係如斯辦法想高明必以爲然也劉子務昨已至津聞甘事又棘乾軍日非商請將省三前調回保定親軍槍礮二營帶往護衛以爲根本趕緊籌借糧餉軍裝定於十月初二日由津啓程多月計可抵秦掘謁面聆教言子務身經百戰而恂謹樸訥如書生與阿叔權奇侔儒者迥異人第知省三威助卓著實皆子務維持於不敝也秦中果有緩急大足倚任敝處卽日覆奏或當微露端倪待公引伸其說蓋臣薦筱午接統之稟未便作禽乾鳳諸將似已知子務前來軍心可定請毋過慮春巖到邠長迭有函告似頗垂涎銘軍

其人長厚而易爲鼓惑若不留陝亦無去處耳

十月十日復何筱宋制軍

滄州途次連奉二十九日兩函以朱守其昂議設輪船商局沈道等稟稱  
望礙多端請暫緩辦等因仰見盡畫周詳虛懷商度欽佩莫名此事前數  
年兩生中丞在蘇撫任內久創斯議並於入 覲時面陳 樞廷欲廣招  
華商購船兼運西皖漕糧峴莊中丞同時在京 樞府卽令丁劉二公面  
議推行嗣仍因循未就總署上年臧商官造輪船變通租運亦踵前議而  
行之也今官船日久無可租賃而總署諄請豫籌定章誠如來示運糧招  
商兩層卽經議有良法將來亦待用需時是議與不議等耳且法者因時  
變通尤待人而后行凡事經始最難若不認真試行焉知其法之良否或  
及鴻章與執事分任通商合力講求利病爲他日官輪招商之嚆矢庶於  
大局有裨朱守熟悉海運事宜輪船生意今夏在津兌漕每與反覆議論

輒敢引爲己任緣所呈章程未盡著實飭赴滬與沈馮二道會商九月初  
復回津面呈節畧謂馮道共與參訂沈道意見亦符祇匆未及會稟弟  
令再與津海關陳道天津丁道議妥後仍回滬與沈道等酌定具覆陳丁  
二道均以購船試辦兼助海運爲將來官船通行之張本求即准行並由  
該道等照蘇商借領練錢章程撥借二十萬串以示信於衆商朱守亦自  
願以身家作抵倡此遠謀不料朱守去已旬日而沈道先鈔會稟稿寄示  
矣吳桐雲聞於事情又本不願官輪招商馮卓儒素肯建議招商者不過  
隨衆畫諾仲復之意實恐華商輪船暢行沙船全歸輪船老關稅項大減  
雖爲私計亦是恆情不知近來華商附搭洋輪亦有殷實沙戶在內咸豐  
年間沙船二千餘號今僅四百號其故可知我既不能禁華商之勿搭洋  
船又何必禁華商之自購輪船我但令招商之輪船與搭洋船之華商一  
律收稅而稍示寬假不加釐捐其貨物之落地分拆後仍照內地定章捐

釐於餉源無甚窒礙至蘇浙海運歲逾百萬石今屆沙甯船不敷裝運到  
津交兌復回再裝籌備糧石至七月尙有來者今添數輪船可補沙船之  
不足非奪沙甯船之生意也朱守自家卽有沙船其親友更多聞已開導  
明白兩不相妨沈道等稟漕糧勢必無船可雇殆非確論尊處與振軒批  
令照舊封雇沙衛各船候運無任觀望貽誤極是正辦朱守僅稟請撥運  
二十萬石爲數無幾弟猶恐商雇輪船分運不及此數也據朱守面稱上  
海棧房業經租定天津亦租有棧房惟其辦事過於勇往誠有獨力難支  
之虞敬乞我兄嚴屬仲復等隨事和衷妥籌勿膠成見致此美舉又復中  
止百年後永無振興之機矣若試辦實有未妥不妨徐議更張鄙見如此  
伏希鑒裁振軒處乞鈔函轉致

十一月四日復邵汴生中丞

蓋臣收撫潰勇本應立即資遣初降之時操縱在握乃貪添兵而忘後患

竟編立成營將至固結難解卽令久統營規必漸紊亂尊處籌給餉需而未允撥隸李譚想李譚二將亦不願兼轄也子務接統銘軍本可共信蓋臣另募三營三哨方患其冗難難治至新收潰卒更恐習氣太深頭緒太多於整飭舊部似不相宜但甫經立營易將後卽議遣散尤易滋事旣食陝餉或仍調歸陝軍徐圖裁併爲便蓋臣添募之際春間迭函諫止不聽此次交替鄙意正恐多此贅疣徒滋耗費是以奏明裁撤知其不欲而有所不得已也詎渠又奏請一律接統迭經核屬量爲遣去仍令子務妥商接辦蓋臣先自離營入省瞻識淺狹其不能鎮靜籌畫可知子務初十內外計可入關秉承指示自可漸就清理銘軍將士早望子務之來卽使蓋臣另募新收者小有枝節固係軍營習態於大局毫無關礙耳春巖暫緩移紮終須進扼平涼以固甘軍後路邪乾斷不宜併駐兩大軍無論其他卽芻糧購運俱形竭蹶祝三來函以軍裝糧運無措不顧西上未知何時



成行筱午兄晉擢正詹希先道賀

十一月十一日復張振軒制軍

與閣下從事近二十年幾見鄙人毅然必行之事毫無把握又幾見毅然必行之事阻於浮議者乎天津新城非不有裨於近畿後患乃以帑項無措後顧無人而中止夙夜疚心茲欲倡辦華商輪船爲目前海運尙小爲中國數千百年國體商情財源兵勢開拓地步我輩若不破羣議而爲之並世而生後我而起者豈復有此識力朱守雖非貞固正大之選此係生意場中果有貞固正大者誰肯出手以爲取雉之媒籠獸之囿焉又何嘗乎朱守可笑馮道初甚慙懇嗣又會稟而大府仍執尋常例行公牘一惟司道議覆是聽曾文正胡文忠嘗言朝廷不能決者惟部議是從督撫不能斷者惟司道是從然則司道固侵督撫之權而陰奪朝廷之命此近今大病也有不可不謀之庸衆者亦有不可不長顧遠慮出自獨斷者

軍事洋務要緊關頭也鄙人於今日時局大不相宜志高而才疏德薄而助寡分應早退以避賢路又恐責望之來無以抵當真覺進止維谷耳彼翁何時起程甚以爲念喬丁文諸公會勘黃運未知如何定議江北新漕似須與賀夫馳商河運抵通有無滯礙再行會奏改從海運所謂擔遲不擔錯也渭春過保云 內意盼兩亭甚切或爲江左真除執事距鄉太近諸多顧忌否則久任必有起色腳疾已愈彼南諒不能冒寒遠行

復鮑花曇中丞

從前甯夏金積堡攻戰時河套北山爲衆回游匪出沒游弋之所宋軍分駐河西足爲口外及秦晉屏蔽誠爲扼塞形勢必不可少者金甯旣克兵與賊皆趨重西南間有游匪多不過三數百少則數十豈能突河防而西至潰變營勇萬一有之亦在西南路爲多彼不由長安八百里平川出關入豫則必由漢南膏壤回楚回蜀何獨繞竄北山河套無人無食之地而

飛過晉燕晉燕分戍之師未必皆睡夢迷糊任其所向如意潰勇以掠食爲計熟知地利未必若是之愚也祝三從我最久年年求退懼左公謫隨聲色不敢親近左公向不喜借用客軍茲不得已而徵調尊處疏留宋又遲疑或要求添助糧運則必不再催亦必不能遠行鄙人實不甚倚毅軍該軍亦無甚關西北大局未敢附和尊論紛紛陳奏俟毅軍果去再從長計議何如 寄諭早經奉到無須鈔寄原摺祕之又祕不肯見示則不便深問矣不才游歷行間親與各將帥通籌全局幾二十年今軍事大致漸了而內外鉅公知兵者已多更不待狂瞽獻替呵呵遠村爲甘藩報銷將與蔣之純辨爭望爲平情秉公理處勿任失意人更添後累

十一月十五日復孫竹堂觀察

籌議法約各節深中窾要彼既無可修改自多有益於彼而損於我教士干預地方詞訟及租買各處田地實爲大病自津案結後稍有戒心干預

詞訟者漸少而謀買田地房產不先稟商地方官硬立契據所在皆有其  
意何居川東重慶酉陽一帶范若瑟私買房地不可勝數近來山西口外  
豐鎮廳蒙古荒地占買亦多若不趁此時明定禁約人民土地必有蠶食  
難處之虞文相既謂爲然祈隨時竭力辨論相機贊成爲幸各國於親  
政後請覲一節勢必紛紛演求弟前晤俄使謂須從容商議遲至三五  
年方覺妥洽倭使亦尙首肯德法國書既來似難久待即使來年可奉  
旨准彼族斷不願援康乾年間跪見之例英約聲明有礙國體是不可行  
已成鐵案將來會議時令其互相遷就恐亦爲難耳南洋大臣屢易生手  
上海爲洋務會萃之地又不得人吳應長技動藉洋人脅偪上司今亦蹈  
襲故智尙不如朗軒雖似學究猶有不聞不見不動不變之勁也朱其昂  
添購華商輪船運漕已有成議子敬樂山極力慫恿幾爲沈道通稟阻格  
不行幸浙省欣允振軒制軍幡然解悟或爲官造輪船開此先路耳直省

添設巡撫言者三條細按均未著實吏治須藩臬幫助巡撫祇多一辦例  
稿之人卽多一意見掣肘之人軍務本總督專責巡撫無兵亦不知兵從  
何策應河工雖 欽差大臣防護亦不能不潰決京官不職外事偏又喜  
談外事言之娓娓動聽絲毫不關要害若爲復設三口游說更爲詭詐難  
測官民皆窮萬一供養不起曾文正於歸併通商時曾力持不可添巡撫  
之議不料舊話重提新樣大翻潞公職慮迥超庸衆諒能主持一切鴻章  
私幸議准卽常駐津門作一局中閒人進退綽有餘裕矣子敬書云近日  
舊瘡又發可慮之至弟十月初患足腫力疾出巡途中服藥敷治日見輕  
減現已全愈承念附及文相精神尙可支持乃中外之福進謁時乞代道  
問總署下半年來兩多係常行事件敝處隨到隨行從無積壓祇因公務  
煩冗久未緘復緣洋務須親自起草自朝至夜鹿鹿無暇便中望轉致  
十二月六日復孫竹堂觀察

執事爲修法約費盡心機默揣熱使晤商總署之語尙多差池羅淑亞前在津卽有欲於宜昌或重慶添設領事專理川黔教務之說鴻章已辭而聞之威妥瑪亦請添宜昌口岸今觀單內五六款須參看議改及熱使欲添專管教務之人其蓄謀固可想見文相力持不可深得大體若輩堅執狡變一時斷難定議子敬函告美領事云電信第亞士被刺法國內變當非謠傳果爾則修約遞國書等事必將擱下我卽乘機催辦伊亦有意宕延卽與林榕樊國樑說得明白熱使總一味含混耳范若瑟逕請翻酉陽前案前已准總署函鈔見示無論巴領事如何查覆斷無可翻之理賠銀殺兇豈有不足范若瑟實各省教士之元惡大愆崇樸翁一手養成自弟查辦後三年不敢回川今乃隨熱使入京求遞奏摺亦知不行但藉口同蜀誇耀權力既經駁斥當稍斂戢若再有波折鴻章不憚出頭爭論也同治四年已定教民公產章程恐難刪除若酌改數語亦佳林繡譯等過西

沽口角已屬樂山查辦轉告狄領事矣朱其昂招商輪船據報已陸續購製四船內有外國新造兩隻明正二月必到滬商內行尙多諒不敗壞初用朱守專爲運漕順手起見二十萬串錢不至無著將來洋商忌嫉必有小口舌然以中國內洋任人橫行獨不令華商展足耶日本尙自有輪船六七十隻我獨無之成何局面卽爲運糧已有益處何彼帥偏聽仲復之言始尙阻諫亦由學識太淺前函爲言路一疏直抒所見不覺太慙乃吾兄竟途當路寓目轉增悚慙畿疆事煩責重非才實慮不支替人更屬難得此所日夕焦憂而莫可如何者

十二月九日復曾侯

家奠文表揚吾師功德與畢生學術心事毫髮無遺遠出江楚諸疏之上沈痛悽惋不忍卒讀叔耘擬稿極爲周詳摯甫惠甫亦各代撰疏稿見不欲薈萃諸長而難於割愛欲專用一家而嫌於罣漏因循躊躇遂積歲月

適家兄已先入奏或恐前後不無犯複之處又峴莊續請專祠僅於疏尾批准六七月間直境正鬧水患九十月後 宮廷又多喜慶迫入冬則聞史館列傳編纂將成勢更無及自維從事三十年未獲剿襲一語上聞以報知己以謝衆望疚恨何窮然吾師功在社稷德被生民天下後世無不知者又何待鴻章一言爲輕重哉鴻章本不文從軍羈官以來廢學益甚鑽仰吾師德業彌堅彌高而文章一道尤愧俯規錯矩故於師門身後幾不敢贊一辭其知者以爲矜慎不知者將以爲倍離耶前請擊甫代擬神道碑文似尙凝鍊於夷務一節尤能發人所未道但視吾師所作羅忠節李忠武等碑淋漓酣宕尙多不及已兩函懇張廉卿另譔遲久未見寄到斯人斯文未有不躊躇滿志而后下筆者擊甫感激恩知尙受迫促姑照錄一通奉呈鑒正如以爲可用或商之筠僊次青諸公再加潤削廉卿僊續脫稿當寄上核定曹比部纂輯全集明歲何時告成鄂省撥款能



足用否望卽示知書成擬在湘發刊抑寄金陵書局聞吳中已刻有文集  
尙未得見此間已請方存之擇選精而要者五十二篇屬京友吳清卿繕  
刻明春夏告竣以公同好直署批牘略爲摘鈔奉上湘鄉另卜吉壤春間  
卽可營葬日月不居音徽愈邈愴戀曷任慕徐借款應作爲師母惠賜萬  
勿令 我輩交親實非他人所得援例也沅文鬱鬱家居想因見罪於中  
貴否則 宣召兼圻體亦宜之直事竟無可爲楚囚無法能脫奈何師母  
大人目眚足疾未愈骨肉又多慘傷務祈設法勸慰

復郭筠僊中丞

久不得見叔度迭閱尊函意緒衰頹頗異疇昔憂能傷人竊用馳系世亂  
漸平正氣漸孤我兄賒伏田間尙可作條然物外之想鴻章膠黠高位虛  
負責望畿疆分內事尙絲毫無所裨補曷敢攬越天下大計在直三年未  
及一望朝貴顏色道路傳言似亦未據爲定論也文正功德應得配享然

向例出自 特恩今當盈廷唯諾之時孰肯倡茲公論金眉生才識卓絕而議論多不可行操守亦難持久去歲賑捐深得其力物議滋煩茲亦稍疏闊矣作梅於重九奄逝頓失臂助四顧愴然子壽蟬蛻浮榮甘老志局殊爲可惜

十二月二十日復孫竹堂觀察

所上總署書崇論閎議抉摘入微現與德繙譯辨別一時似難入彀教士入內地歸中國官約束如能辦到可杜後患法國固不能允行各國亦豈肯作主若教士由地方官約束則各國游歷商人入內地者亦慮援例辦理璧繙譯所云各國公論定爲教務公共章程一語似頗破的法義兩國傳教在本國及各國者甚多近來未聞滋事必有通行公共章程我國應援照一律共保無事此項章程西洋當有專書如能尋獲譯出以矛刺盾彼族當無異詞若無證佐僅憑舌戰殊爲費力欲藉他國公論以制服法

使恐皆腹誅心議而不便公然出頭耳法人多糊塗矯強而熱使明白裝糊塗疲輭實矯強更難說合矣宋丞心地忠實必可得用其言語未慎處須常提撕之李振玉底細不甚深知前在津與朱守商同合夥該守回滬後以衆論不洽又經辭退胡雪巖來函畏洋商嫉忌不肯入局尊論以閩粵人財雄力厚或能效其所長角逐取利確乎不易津郡粵商久經稟求因貲力不厚未敢妄允葉令廷眷如能入局會辦當可招致粵商但廣幫與浙蘇等幫向各爭勝難遽合同已屬敏齋轉致葉令此局創設要須隨時設法變通以求經久日本外務卿副島近有照會云奉派來津換約觀奉國書年底至滬卽乘舟北上 旨派何人互換諒已與聞彼必懇進京觀賀不免稍費唇舌

十二月二十二日復彭雪琴宮保

連奉冬月二十九揚州嘉平初三瓜洲手書過承拳念惟兩函前後不甚

聯貫想見應酬冗煩精神實非昔比 內意初尙強令老兄作官自以不  
官爲是弟日在塵網中勞勞碌碌於時事毫無補救又不敢言退仰視孤  
雲野鶴翱翔天表聽其所止而休豈翅仙凡之別遙計此時卓錫西湖山  
色水光梅花殘雪中著一釣蓑老叟意境清曠宿疴當更錫除念甚念甚  
冬令閉藏乃亦咯血兩次自緣長途困頓所致年力已頽乃猶痛自刻苦  
而孱軀已不克勝所祝隨事逍遙純任自然養此餘年飽看江山人事之  
變態一尋赤松黃石之前緣耳 聖明飭江楚代籌巡江公費該兩省開  
款尙多力非爲難奏銷與否亦不必計與其負累友朋提回兩鹽道公款  
致長江營內匱乏無告似不若遵 旨咨商江楚二督另籌專款以公辦  
公尙屬光明正大幸勿矯廉與吾當不准入 觀昌期聞尙灑落欲卽寄  
居金陵能稍有蓄積可娛晚景否昨徐壽蘅與貴鄉諸公商請敝處疏調  
此間現無軍事昌期亦本必遠行祇有存而不論惟熱腸朋友患難至交

弟與我公皆難忘情長江已經參革各員弁如有查明歧誤或窮而無歸  
者並懇隨時與吾籌商開其自新之路是所切禱涂朗軒函告文正師於  
明年三月初八日卜塋湘鄉文公山歲月易逝感舊增傷弟回省後公私  
順平來春聞有 謁陵之典奔走未嫻深虞隕越

李文忠公朋僚函稿篇目

桐城吳汝綸編輯

卷弟十五

正月十一日復孫竹堂觀察

同治十二年

正月二十一日復孫竹堂觀察

同治十二年

二月十八日致沈幼丹中丞

同治十二年

三月二十二日復吳仲軒制軍

同治十二年

三月二十六日復孫竹堂觀察

同治十二年

四月二十二日復孫竹堂觀察

同治十二年

五月一日復丁稚璜宮保

同治十二年

五月二日復袁筱塢宮詹

同治十二年

五月六日復孫竹堂觀察

同治十二年

五月十一日復錢調甫中丞

同治十二年

五月十四日復李雨亭制軍

同治十二年

五月十五日復何子永中翰

同治十二年

五月二十日復孫竹堂觀察

同治十二年

五月二十一日復袁筱塢宮詹

同治十二年

五月二十四日復郭遠堂中丞

同治十二年

六月一日復李雨亭制軍

同治十二年

六月二十日復沈經笙宮保

同治十二年

閏月一日復丁稚璜宮保

同治十二年

閏月六日復沈幼丹中丞

同治十二年

閏月十二日復李雨亭制軍

同治十二年

閏月十三日復吳清卿太史

同治十二年

閏月二十五日復劉開生太守

同治十二年

閏月二十八日復袁筱塢宮詹

同治十二年

七月一日復喬鶴儕河帥

同治十二年

七月十三日復錢調甫中丞

同治十二年

七月二十四日復李兩亭制軍

同治十二年

七月三十日復丁稚璜中丞

同治十二年

八月十日復陳荔秋比部

同治十二年

九月二十日復鮑華潭中丞

同治十二年

十月某日復王夔石中丞

同治十二年

十月二十二日復馮景亭寶元

同治十二年

十一月九日復汴生中丞

同治十二年

十一月十一日復張振軒中丞

同治十二年



十一月十三日復劉仲良方伯

同治十二年

十一月十五日復丁稚璜宮保

同治十二年

十一月十六日復彭雪琴宮保

同治十二年

十二月九日復李兩亭制軍

同治十二年

十二月十日復政大臣沈幼丹中丞

同治十二年

十二月十七日復朱修伯宗丞

同治十二年

十二月二十一日致曾劼剛通侯

同治十二年

元日致宋雪帆侍郎

同治十三年

正月二十日復邵汴生中丞

同治十三年

正月二十八日復李兩亭制軍

同治十三年

二月二日復邵汴生中丞

同治十三年

三月三十日致船政大臣沈幼丹中丞

同治十三年

李文忠公朋僚函稿卷第十五

桐城吳汝綸編輯

正月十一日復孫竹堂觀察

同治十二年

沈仲復朱雲甫連次函牘似均和衷竭力籌辦輪船已定購四隻內有在英國新造二樣用煤少而行駛速或可漸求開拓尊論添招閩粵巨商入股已屬振軒中丞轉飭招徠朱守二月初來津當再面籌壹是長江運鹽一時無此氣力兩江亦未肯變通也近赴法館會議約事有轉機否日本使臣尙無到滬信息計二月初北洋開河卽正杪過滬不遲總署覆奏當有行知三月間謁陵盛典直督向須入覲迎扈現飭地方官趕緊預備弟若於二月初赴津料理換約事宜恐未能如期請覲耳地亞士行覓到鐵礮臺樣可屬王守於三四月運津查驗再行商辦四磅克虜卜礮兩尊挖河機器並屬開河運交劉含芳驗收俟爾錫遲日令其來京試演

電線爲幸

正月二十一日復孫竹堂觀察

日本換約已奉 旨派敝處承辦換約無甚疑難惟 覲奉國書一節須妥爲開導屆時伊必求進京中外合力商籌務求妥協該使副島想難久住其國書不能面遞亦應設法回答耳弟擬二月初赴津如副島等卽來與之面商大略月杪再行請 覲隨扈屆時換約若未竣事或屬琴軒子歆與爲靚縻弟仍抽身迎扈伺候 召見典禮攸關誠不敢疏漏也法教士聽中國約束各使未必附和欲高一層入題當預備收束之法現計會議過期是否照會各國公議執事久勞於外不遑顧家殊堪憫念現奉要差未必准假南旋極盼約事告成榮膺闕篆靜以俟之可乎

二月十八日復沈幼丹中丞

京朝士夫不顧念中外大局訟言船政之非總署心知其理而怵於成效

之難亦遂渙浥依違若非我公大聲疾呼挺身獨任鮮不墮中道而貽笑柄者鴻章涉歷洋務已十餘年嘗苦有唱無和今季帥與執事業有成局敢不藉事直陳稍佐遠略和翁前過津時謂內意不甚以爲然卽微露譏阻之辭弟方勸其與執事同力合謀以求經久乃猶若浼焉人皆視官如傳舍獨公不得視局如傳舍一有司事耳而令長才夙望久覲於此且時憂度支之告匱將若之何司農豈知國計卽奏撥恐亦空文似宜從長計議俟造船限滿付託結實可靠之人以善其後而垂天之翼經緯六合仍左右主持之斯經國之大計也近世非疆吏不能治軍辦事惟所欲爲弟雖爲畿省貧瘠所困仍日盼我公兼圻東南宏斯遠謨一振頹綱雪巖領辦十二號商船或可稍資津貼敝處試辦招商彼族當無異詞華人偏增多口大都殷富詭寄洋行幾疑中國之不能自立試行數年後僮亦于于而來耶聖主親政各使力請覲賀文相議令通融禮節勉與

枝梧法國內患未平脩約亦無就緒惟俄據伊犁屢屢東犯世無班定遠  
趙充國其人勢將陸沈莫返左公已老得隴便爲幸事似未能強令出塞  
矣心泉溘逝大文表揚簡重高古足垂不朽容爲轉致同人弟忝竊高位  
毫無報稱擾擾於簿書酬應之間精力愈疲才志愈劣不堪爲知己告頌  
以 陵差期近卽入都請 覲隨扈倚裝匆復不具

三月二十二日復吳仲軒制軍

松建巡閱之舉計已載途露冕宣勤可勝馳念慎黔善後尙無端緒協濟  
之日正長隴軍雖有起色而關外諸軍調撥日增誅求未已想已躊躇四  
顧應接不遑敝部分防難遽裁撤額款並煩籌顧深爲感慙耳 親政以  
後一切率由舊章氣象極爲肅穆請 訓時蒙勉以實心實力辦事每日  
臨朝典學 聖躬倍形勞勩而諸務究心諸事順手實中外臣庶之福  
也昨以 陵差回鑾霖雨泥淖 兩宮行李輜重落後至同京始行發落

亦可規 聖度之淵深矣各使求 覲甚力總署欲令跪拜如儀乃又不肯自違該國體例 朝廷念其恭謹無他意或姑許之

三月二十六日復孫竹堂觀察

各使請 覲一事業經總署 奏准妥議日來籌議章程若何尙不過費唇舌否深系遠懷前閱新聞紙有云歐洲各國見君之禮祇屈一足其君亦舒一手以引之其臣乃以鼻接其君之手然後命之起侍立於旁昨密妥士過晤便中詢及據稱亦屈一足未知崇志諸君在外國所行禮節有異同否如能屈一足略與中國請安相等卽不跪拜較爲順眼又萬國公法云概以內廷延見文相欲令在海子等處 便殿召對果可行否鴻章與議於六年冬間昨在京亦經面陳大畧現既奉 准似可不再煩瀆惟翼議奏章程速定藉釋外廷之疑慮則浮議當漸息矣吳清卿匆匆接晤未便深談此事乃倡爲迂論殊出意料之外近又有人續奏否當局事理

非淺見所能測量也日使副島十三日自滬啓程二十四始到津門尙未來見若逕赴京總署自應駁回彼必觀望請 覲可成乘機合從其帶兵船二隻至大沽貌爲恭敬隱示威武當以度外置之總署司員辦公清苦義應各海關籌給津貼但須先奉公函商辦乃可定數所上赫德條議當蒙采納信任已久挽回殊不易也

四月二十二日復孫竹堂觀察

東使在京諸承指示傳宣動必中禮佩慰良深副島何日拜謁總署前據面稱欲早回國辦理祕魯議約之事緣祕使在彼專候似尙近情熱使言日有難辦之事或卽指此至謂西人以中國太弱勸以乘機邀利難保彼族非故意挑畔我無訕於西人更無嫌於東人畔從何起臺灣生番一節昨臺灣同知黃維煊護送法人德克碑進京議教堂事面詢生番地方險峻趨捷美人屢攻不得手李仙得雖曾去過無奈伊何且琉球稟閩帥甚

感收撫難洋豈日本所應過問王補帆函告李仙得爲廈門領事殊不安  
分今聞招令通事林鍼往充日本隨員林鍼是否在隨員中似不甚確李  
仙得不通中國與日本語嘗前在津時略與寒暄並未過加指飭亦傳聞  
之誤矣各使請 覲已否奏明交議副島尙能靜候隨班否前換約本該  
國既有上諭爲憑似可勿容深究彼數千里來專爲此事豈可因小節較  
同耶德克碑爲傳教一事頗發公論左沈諸公令其齎書往商熟使似與  
修約稍有裨助到京時希晤辦理爲荷

五月一日復丁稚璜宮保

河務關係甚重弟涉歷南北雖略有聞見未敢率爾覆陳經費現正短絀  
亦未可遽興大工詳諮上年侯林工程結實可靠目前當無南溢之虞祇  
此大害必須亟防此外似皆從緩至治河而兼復運道南北似均無把握  
若運不能復則河亦奚須大治反復籌維尙無兩全之策容再與撫屏熟



計並博訪周咨確實情形參以管見再行繕晰上陳瞬屆伏秋大汛務祈嚴飭印委文武設法保守侯林官堤民埵勿任再有潰溢掣動大局爲幸六舍弟咳血屢爲庸醫所誤幾致不起尊論洞見垣方欽佩奚似幸得撫屏診治連服數劑夜燒不眠已漸解退惟元氣太損肺熱未減正在醫調得手之際日易一方相依爲命前聞撫屏傳諭立限十日回省已切屬其專稟多留數日茲奉飭催薛道並呈閱尊札曷任惶悚焦急之至可否垂念病情稍緩旬日如服藥大效卽請其妥訂方劑兼程回東感荷盛情豈有涯涘

五月二日復袁筱塢宮詹

子建舉劾省三皆未可據爲定論前事實因瑯邪一言而發物先腐而後蟲生其故又不在瑯邪也敝處與省三太親又係原保之人豈應嘖嘖置辨若由他處轉陳較爲得體現已清平留意將才者蓋寡矣西使以敬其

國君之禮敬我 皇上彼自謂情理已足而書生不識時務欲與爭此小節所謂放飯流歎而問無齒決自強之道固不在是聞須 廷臣集議而後行似未可中止耳

五月六日復孫竹堂觀察

副島因 覲事未有定局偶發狂言執事二十四日面諍之言殊爲得體各國會議節畧既經畫押定案簡明方單幾成贅文宜西使之退有後言也日內計已入告 諭旨若何深爲懸系周禮象胥以時入賓則協其禮注疏云洋狄之君不能行中國禮亦當以禮和合之使得其所此實可爲今日證據將來奉 准後繪圖擇期至早須本月下旬副島急欲東歸想須耐性少待同一不跪自無庸另班分起矣沈仲復四月二十一日函報英法美到滬兵船不少聲稱聽候此信如請 覲或有齟齬難免堅求等語請爲密致總署弟知此事已有成議虛詞恫喝斷不足信故未函告免

致無端搖惑頃晤密妥士據稱津商僉知識單畫押事在必行遠人同聲  
翕服儻新聞紙亂造謠言切勿輕聽爲要

五月十一日復錢調甫中丞

賈魯河工隄岸改作坦坡出土在隄外二三十丈均極得法兩岸再築短  
垣隨時脩補或可經久人謂不可恃者以浮沙爲害易也但於此事著力  
諒不至遽爾頽廢工用十萬串餘殊爲核實子忽衆中矯矯固所夙知尙  
不料實事求是若此爲左右得人慶也芍亭擢京兆敝處亦得一助其世  
兄能掣豫省爲佳朗齋西行儻援宋軍之例豫力更竭張宋似須出關來  
日大難實堪危慮黃丞到滬後適鄭玉軒來津詢及謂該丞結實精細將  
來歷練既久當能擔持局務祈隨時策勵之渠本無宦情若藉局差爲謀  
遠大必有裨也前在京與樞廷談經筵極稱執事到豫百度維新他處  
未聞道及釐局認真未能盡泯物議求盡其心而已舍幼弟病幾危殆幸

撫屏來診漸有起色或可徐圖復元撫屏亦回東矣

五月十四日復李兩亭制軍

瓜棧連年坍塌必須改復儀徵故道言官條陳自由岸商指使初慮勒加捐費今經執事奏明不再加派當釋羣疑秦壩交鹽諒亦不可久行恤商以不輕增捐費爲第一要義公必能堅持之鳳皇山三營改調整頓極合機宜樊振聲寶如田均尙勤樸無習氣小軒所部移紮浦口操防策應較便陸路分布尙密自可無虞水路準備本非易事江南留防水師各有統領外人似難撓越尊意欲調春帆若令其督率諸軍則無此權力若別置一軍似又無此餉項若僅作營務處或委員恐亦無甚實濟請將如何布置之處詳晰密示再行商辦春帆才大心細吏事允精在粵最久屢更事變軍務洋務亦有閱歷樸訥堅苦平易近人因瑞相氣味難合年踰五十慮其坎坷以終故借借機器局 奏調來津非本意也惟直省濟濟多士部

章近更嚴束思有以振拔之而未得一當渠係同鄉至戚宦情尙淡暫相  
依附似不欲再客諸侯既蒙見推如度其尙可有爲弟亦奚所吝惜也鄭  
玉軒來津津關陳道方稟留幫辦藉作替人稔知卓儒不足獨任姑令回  
局並屬其預覓替手滬局關係甚重玉軒早遲必爲關道深恐倉猝無措  
勉林前事大爲當路所忌前在京雖向寶佩翁詳陳巔末繼復頂奏未聞  
部議如何儻再駁回卽令回甯差遣蔣湘泉之請本出意外業經另委在  
先自勿庸議日使到京後力求 覲遞國書將與西洋各使聯合一氣總  
署已與議定節略日內須再請 旨無禮之禮似須稍示包容上海謠言  
固不足信臺灣生番一案尤覺離奇日人力小謀大可爲切近之患中土  
不亟謀富強倣擾正無已時耳

五月十五日復何子永中翰

執事筦樞餘閒兼任興脩水利才大心細自能措置裕如惟六句以外尙

如此耐勞躬親庶役蒲柳之資所遜謝不敏者矣海塘工費既 奏撥釐金二十萬昨見振帥咨鈔疏稿又撥善後一成塘工是否在內敝軍蘇滬額款幸勿因此缺誤感賴曷任現留防各省之營似有倚爲安危之象難遽遣撤而直境各軍造城築隄脩礮臺時藉發欠餉以資工料 國本所繫窮家難當不得不爾也仲春晝接當荷 聖明垂詢防軍幾許 樞廷諸老從未議及亦不識留防何用餉源何在但知東南非與鴻章素習者不足任倚而鄙人既膺鉅艱亦不敢過避嫌疑獨高潔淨丈當鑒此苦心耳承以驕吝示戒所以期勗之者良厚姬公之聖豈庸駑所能幾及一一惟時時省察客或未有驕則難言必無世俗競尙諂謙曾文正亦嘗言彌謙彌僞鴻章生平不慎作僞人或議其不謙不謙其卽驕之萌歟才並非美奚足以驕聞公言益自儆也振軒厲精圖治而不至操切儻有識力未甚穩定處望朝夕匡助之畿疆積歉之餘吏治民生頗欲壹意休養而難

於面面肆應若朽索馭六馬不能馳驅亦不能釋手長此惴惴 聖皇仁厚恭儉多得良輔中外之福也

五月二十日復孫竹堂觀察

奉十六日手書鈔件敬審於東使求 覲一事調停委曲控馭得宜副島機警英鷲初八初十兩次照覆目中無人閱之殊爲髮指所以矯強之由不過該國近來拾人牙慧能用後門槍礮能開鐵路煤礦能學洋語洋書能借國債能製洋銀數事耳我中土非無聰明才力士大夫皆航於章句帖括弗求富強實濟被彼一眼覷破遂肆意輕侮口無擇言雖將彼此照會撤回而使若輩得以嘗試以後交涉事機關係非淺鄙意當時彼卽出京詘不在我何至起衅衅既由彼何至動兵卽使興兵又何畏此小國日本在唐宋以前貢獻不絕至元世祖往征大敗後乃夜郎自大今彼雖與西洋合好尙無如朝鮮何豈遽能強壓我國耶副島在津時並無一語強

迫不意到京以後漸露鴟張總署入手應與而議禮節免致筆墨痕迹斯上乘文字也迨以一挑半剔惹出大鼓金槍非執事慘淡經營幾莫能解此圍矣十四具奏 諭旨若何能卽定期進 見否中國以後若不稍變成法徒恃筆舌以與人爭正恐長受欺侮焦悶莫名王邊二侍御疏稿便中鈔示總之爭門面而不切病根終搔不到痛癢耳李兩帥函懇勿久留鄭玉軒滬局實不可無此人是以姑令南歸

五月二十一日復袁筱塢宮詹

肅城圍困已久賊之薪糧當漸不支早晚冀可得手關外之事計必責望季帥加籌糧運巨款則非易易張宋踴躍遠征殊可敬憫合之金軍已二萬餘人兵數尙不甚單惟與景榮諸公商辦號令不一恐不免意見歧出耳朗齋前隊已抵肅境後路采運之費尙無著落亦覺可虞秦隴近得透雨否大兵之後必有凶年子務來函深慮購糧不足欲請移駐周口妥籌



撤留秦中是否尙須鎮扼汴翁能否放心未便遙度也長才獨任轉饋瞬  
已五年甘境肅清似可商請 奏撤西陲稽臺例設肅州一司道足了之  
無爲居此鬱鬱坐耗歲時內而台輔外而封圻非擺脫此役恐未能奮翼  
矣各使 朝覲已於五月十四覆奏未聞 俞旨若何翰泉捐事部友皆  
允照應惟祈尊處速辦爲荷

五月二十四日復郭遠堂中丞

手示細字行書圓勁秀潤益徵老福之無量鴻章別甫四載髭鬢皆霜目  
光頓花看書作字非鏡不可今歲亦已留髭夜常不寐觀公殆猶孺子而  
蒲柳之質能無對松喬而增慙耶往承提命以夜分須眠公牘逐漸挪早  
服膺未忘來示更拳拳及此彌感愛我之厚年來已定約子初就枕少壯  
遲眠積習已慣往往伏枕至丑後始可熟睡然閉目靜息精神較旺其得  
力於箴規者多矣

六月一日復李兩亭制軍

各使 朝覲一事昨方照鈔總署議定儀節單寄覽旋聞英使以不帶刀劍不親遞國書爲非日本使臣自居頭等欽差欲請同日先班進見又不應將國書置於黃案嗷嗷置辨副島口出怨言謂卽辭去回國並牽及朝鮮與我臺灣生番等事文百翁雖與力持而尙無成說勢須改期俟有確信再附聞前有臺諫紛紛陳奏強令行中國之禮奉 旨交議揣度時勢不敢不直抒臆見 聖度幸可包容異族猶懷缺望倭用西法爲歐洲所共推乃肆行無狀若此茲事諒無中輟邊患何日能休耶劉玉龍礮營初初本係五哨嗣因剿捻調出一哨併歸別將餉項稍缺遂未議添尊意如須足成一營祇須添還一哨礮隊爲防軍根本兩江形勢尤宜文正師南下時曾屬加意訓練嗣聞祇看操一次劉將每請增募弟故未許西洋兵法以礮爲主槍爲輔然有至理而礮中事理極精而蹟非素習者不測涯

浹亦遂不適於用公僞有意於此姑令照舊募足可乎滬上機器局誠如  
尊論事太多則難精卓儒尤有貪多嚼不爛之病鐵甲船需費最鉅不知  
何時能成卽成能否比照西洋之小者粗者大礮則熟鑲來福礮尙未多  
造遑論鋼礮前以輪船用自造銅礮太壞飭令多購布國克虜卜後門鋼  
礮以應急需非得已也然礮雖購而其合用之子藥尙不能仿製昨已切  
屬玉軒等趕圖之水雷係江河防險祕器其必需之磺強水電綫亦不能  
造卽此三事度局之力一時斷不易成不易精也該局現可用者兵槍林  
明敦後門槍小銅礮三事制中土則有餘禦外侮則不足兼致力於鐵甲  
船熟鐵礮水雷窮年積歲取精用宏庶有孚乎劉佐禹糊塗無用遷就至  
今尊示留其薪水不必進局敬已照辦段道才堪遠略微涉粗豪乞就近  
提撕指示該局舊存造火藥機器聞尊意可籌費酌爲添置造藥以備江  
防之用敝處現有專造洋藥一局可不需此乞與段道商之水師人才無

瞻厚庵文正欲招致而不可 朝廷亦難遽畀事權且無以處雪琴耳衛  
靜淵聞可於中途接道篆亦佳江南北望兩甚切近沛甘霖否念甚此間  
麥秋尙好舍幼弟久病不愈殊爲焦憂

六月二十日復沈經笙宮保

博翁假旋自可刻期回京此數月中總署公務尤勞碩畫倭使晤談大略  
前已由公函詳陳計邀鑒悉祕魯責問扣留華工一案窺其詞意微形餒  
沮所稱須遵日本禁令方准立約恐辦不到西國約章無非大同小異祕  
魯未必獨變一格日本果能翻新似中國亦可比照惟將來若准其議約  
必與就此機會嚴定招工章程以除民害蓋英法美德向少招工之事從  
前定章似尙未盡嚴密現惟祕魯葡萄牙等國販運鴉片流毒滋深無約  
則無從追究有約或可明設防閑未審卓裁以爲何如美英皆爲介紹其  
實該國皆深惡祕魯等凌虐華工香港粵紳曾籲求英國援救聞已允之

威使乃代請議約已自矛盾一經駁覆當無異詞如能從此中止尤妙昨接陳荔秋主政蘭彬三月間自美國致上海劉道翰清函稿旨出洋學生情形及各國新聞甚爲詳晰照鈔奉覽英人欲由印度緬甸開通滇蜀之路雖久蓄此志似亦無此才力也初九十日大雨轄境均霑秋禾甚茂此後不憂旱而仍患潦永定漳沱既無治法不得不於下游各支河設法疏鑿冀其入海稍暢爲害少輕弟任重事煩時虞隕越加以內顧多戚無可仰慰慈母祇增惴惴

閏月一日復丁稚璜宮保

日來將籌議河運情形繕疏覆陳侯家林上下民謏欲求執事加培堅厚或再接築至曹州西北永免南竄之虞將來若奉 准行尙祈鑒諒爲幸艇船礮位聞係購自布國克虜卜必係精品得人操練講求合腔子藥自可威敵制遠殊爲欣企江北漕艘亟盼黃汛增漲得以浮送入運惟黃運

之交既不能大舉修治漕行終難通暢恐未可執爲常例逐年照辦耳

閏月六日復沈幼丹中丞

添設保定巡撫之議聞係旁人覬覦添缺遂不顧事理之當否吏部尙欲准行經 樞垣文相力持不可似專爲遷就鄙人者其實有兩京兆分管二十四州縣熱河都統分管承德府直省何曾僅止一督郭筠仙嘗謂督撫同城爲我 朝弊政與尊論同非久於歷練者無此卓識也日本使者副島種臣饒有智略由京回津過謁遽問總署大臣十人奚爲若得力則一二人足矣弟前在都曾詢經筵堂官愈添愈多不知用意所在渠笑而不答乃竟被外邦明眼人看破部務猶曰循照舊章牢不可破豈新設衙門亦必比照而更加多徒貽譏於海外耳黃守偕德克碑至都弟徇其請加給咨函博翁適因 覲事辦竣乞假葬親德克碑雖議有眉目無人敢與主持遂爾中止此卽堂官太多之病也所造十二號商船計將下水十

三四五號年內能否造齊雪巖認領聞尙游疑保險似宜少作價敝處招商局在英國購製三船裝貨多而用煤少行駛亦速或值七八萬至十萬不等閩滬各廠工料過昂每船減算成本似須十數萬商人惟利是圖精於計較豈肯受意外之虧累輪船原無一失而例須保險作價少則保資亦較少庶易招徠惟發商租領一節實爲官廠遠大之圖如何可減輕作價似須奏咨立案以免局外及日後謗議伏希卓裁朱守其昂創辦商輪今屆搭運正漕乾潔異常頗著成效華商詭寄洋行者多方忌沮股分過少恐致決裂又招致精習船務生意之粵人唐丞廷樞爲坐局商總兩月間入股近百萬此局似可恢張雪巖如不便另立門戶或勸令併爲一局將來竟易名中國輪船公司則名正而勢遠尊處新製四號儘可商令陸續承領酌定租價更爲經久之計朱守唐丞云將稟請鈞示尙希核奪飭遵爲幸別十五年蒲柳易衰鬢髮半蒼來示齒落髮白老亦至矣願同志

愈少幹濟須才公卽忘情於世世非無意於公俟限滿遣散洋人務祈妥籌善後之法酌留工匠經費俾常能營造接濟祇須付託得人必爲國家百世之利矣昨因舍六弟幼荃北來久病不愈遽歿津門幼弟從事兵間轉戰南北患難與共年甫四十竟求原隰意緒頽喪無可告慰

閏月十二日復李兩亭制軍

前奉六月初四日手書適值舍幼弟之喪心緒煩鬱久闕報章頃又奉六月二十四日手示猥蒙慰勉殷拳感銘曷既幼弟智勇深沈性情耿介文正師及馬何諸帥頗相引重淮楚將吏深知其賢鄙人未了各事方冀得有付託不謂一病不起在尋常修短之數原無足怪而鴻章處此不覺萬念盡灰天之阨我如不我克從茲以往長孤立於人世矣篤臣英姿颯爽何亦遽賦大招人才榮悴動關世運有心者徒爲殷憂尊論江防各事殊中竊要驚鼻噴豔山關礙隄兵房建置果得宜否無事時略爲脩整稍壯



聲勢自愈於全未料理後路各練三陸師似尙無此氣力小輪船如鐵皮者不得遂稱爲兵船西洋此等船不過爲探信巡哨之用非以戰也入內河夾港中則虞淺滯若長江往來則又嫌小如閩滬現造各船雖不能戰於海外或猶可戰於江心蓋船以礮爲用船稍大者載礮較巨射子亦較速如鐵皮不能容萬觔之礮雖多奚爲水路主守陸路主戰二語實爲中國禦侮救急良法然水路何以守曰扼險礮臺守口礮划攔路水雷而已此三者皆須於平時儲備弟兩年以來督飭將士脩築大沽北塘海口及津城東北各礮臺窮年工作尙未及半徒以京師門戶不敢不竭力經營而款項既絀工程浩大物產土宜又不如南中之順手究恐終無成就各國官商往來茲土輒相探詢疑詫亦可哂也外人觀禮告成一時無所覲覲不至遽啓弊端我等惟隨時擇要布置勿忘勿助可耳祕魯因去年日本扣留華工往與詰難乘便議約倭使副島過津面稱回國先辦此事

英美各使現向總署爲之先容欲卽來津議辦尙未見到將來必有一番饒舌北省雨多且大黃水灌運較早曉運已帶糧艘至津鏡瀾聞先回籍再至金陵接替昨覆陳黃運經久辦法附請停止河運部議卽未必准當可略鬆

閏月十三日復吳清卿太史

月來間日大雨幾如前兩年水勢幸下游河隄迭飭脩濬衝決尙少永定河新開南上灰壩洩水頗暢較勝於金門開迄今未報失事若竟稔晴冀免重災芻翁前商大治永定漳沱二河覆書已詳言之曾文正師初莅直時亦頗倡此迂論甫試輒改究無所成河病太深款項無措也治河與用兵等最重方略機宜用兵須度賊情地利治河須察水性地勢 聖祖聰明迴軼凡近永定下游展寬四十里俾得蕩漾游行而後入淀津歸海嘗履其遺蹟深爲欽服又竊憾上游何以僅十里八里五里三里之狹宜歷

來漫決皆在上而不在下也凡濁河中泓皆非疏濬所可見功明之潘季馴本朝靳輔均以治河著稱然著力於隄防而已能見功而亦不能持久今喬鶴翁築隄束水之說則並不能施功昨已據實詳細覆陳雖蒙俞旨恐又滋局外之多口自元明迄今殆七百年河務漕務救病不遑浸成漏卮迂儒動稱法古復舊而不思天變已成之局後世無窮之患名曰振作實同苟且近人惟敬亭先生與鄙議差同耳

閏月二十五日復劉開生太守

西班牙古巴等處凌虐華工各國官商皆爲不平屢見新聞紙詳載其事想尊處與荔秋等均有所聞總署邀同各國公評各使又爲袒庇不肯直說擬請荔秋就近訪查得一證佐如令純甫等往查確實固佳否則須尋覓曾在古巴夏灣拿等處受虐之華人或有洋人在彼處目擊情形者照錄確細口供具覆俾可援據抵制是爲至幸祕魯西班牙招工一事最爲

可恨其所販賣粵人尤多班國早定和約祕魯現又將來華議約弟方緘商總署設法諭禁若班國此案不得論定則祕魯請准招工賠補勢必援例以求荔秋有心人當能爲桑梓弭斯後患也前閱閣下鈔示荔秋三月間來書因有關係要件當卽鈔致經筵大司馬送交總署公閱咸深倚重此後來函仍望隨時錄示以廣見聞

閏月二十八日復袁筱塢宮詹

讀致兩振兩公函詞義極爲懇切必有以慰友于之摯念吏兵二部新章將軍營立功例應請卹人員一概抹煞足令志士灰心勞臣短氣篤兄係在任病故又非軍務省分兩帥若援向例具奏卽准行必遭駁斥況近來似此奏章多交部議更無可准之理敝處辦過數案均如此也惟請附祀年伯端敏公專祠及馬端敏祠則與新章無礙而於公議無虧定可仰邀特旨想兩振二公當能詳核入告也篤兄靈輅何時西歸其樸厚忠

貞氣概絕不料享年未永大用無期天奪善人可勝長歎子務留營實迫於萬不容已少遲相機給假斯爲善全之道肅州祇有困困斷絕接濟之一法窮寇死鬪勿與爭鋒左帥仍不自將爲是西北人多勁悍耐苦熟習賊情尊論因地取才最中肯綮惜無其人亦無巨餉耳畿輔兩涼殊盛日內稔晴秋收或無大減

七月一日復喬鶴儕河帥

治河一事鴻章反覆籌思霍家橋一帶堵築爲難且動巨帑興大役以謀借黃濟運之下策其勢必不可持久儻貽後悔當慎先幾不敢不據實陳明摺稿並欽奉 批旨已鈔咨冰案定荷鑒原侯家林上下民坵卑薄本屬可虞散疏內切實言之並迭函商懇丁稚翁加意脩防秋後須動帑大脩與官隄一律高厚然後責官民以分守東庫存款尙多力能自爲今來教持論相同益佩蓋籌卓識郛城決埝水又南趨稚翁已否奏報丈可

勿引爲已事或不妨催令脩治也近月各河漲溢黃水似較往年尤大東明境內據報出槽亦有決口漫田之事竊謂鄆曹隄工最急銅瓦廂下至東明次之擬請吾丈分任其役者緣在豫直境內大力尙可主持千祈加意聞豫工屢見危險賴福星保障而魚山下至海口實得就下建瓴之勢下不壅則上自不潰矣此間水災又重永定河仍報漫口秋後雖已暢晴猶間日夜一大雨殊深悚疚華商自購輪船搭運本屆正槽尙爲妥速由此擴充似不必專恃河運河運亦實無把握然旁觀議論恐仍不免耳  
七月十三日復錢調甫中丞

黃運一疏旁諮博考證以歷年所見聞非敢苟爲之也惟董大農由湖南糧道起家道咸之交曾督運艘又箸有江北運程一書自謂博洽堅持河運必不可廢鄙人亦豈欲廢六百餘年之河運無如窮其力之所至不過僅運江北十萬石於事奚裨且通塞遲速全聽之天 國家經久大政何

得任其苟且僥倖耶。兵事既無把握，嘗欲於無把握中求得二三分。若河運則茫如捕風矣。咸豐庚申，洋務極爲倣擾，是年海運亦能到倉。此後萬一敗壞，尙不至如庚申之棘而論者不揣事勢，僉以海運不可常恃，毫無依據，並爲一談。書生不知而當軸亦不記憶，其省費省事更屬判若天淵。中國明有大江大海之水，可以設法濟運，乃必糜數千萬財力與濁河爭前人智力短絀，後人仍樂於沿謬襲，謬不思今昔時勢之殊，不其傾乎鹽漕河爲三大政，鹽爲大利，漕河則耗大財而無大益。以列聖之經營，未有十年無失事者，不及此變計，恐將成元明末世河患與賊患相終始矣。近更添一外洋江海各防，毫未料理，乃亟治不可得治之河，以求濟不可再復之漕，彼族每詎中國無人，其信然耶。執事明於時局，輒復縱論及之。七月二十四日復李雨亭制軍。

直省夏秋之交，雨水過大，與十年情形相等，不獨永定潰口各河無不漫。

決汪洋數百里間疆吏失職殃及窮民可勝負次漕糧已先運通無可截撥正在焦籌適奉二十日 特旨飭令各省協撥巨款謹鈔錄奉呈十年之災幸賴文正師籌捐淮商二十萬現在淮南似無可議聞淮北積引尙多願捐資領辦者能否設法籌湊望執事一爲援手蘇屬秋收若何釐款似無多助並乞將鄙意轉致振軒中丞尅日籌商示復以便覆奏感禱曷任

七月三十日復丁稚璜中丞

成山爲東海險要之地尊意不肯輕以與人極是正辦惟洋關既設所收船鈔一項專爲各口塔表望樓之用載在各國條約因有稅務司幫辦權務燈樓各項取其與洋船測望相宜不得不令其經辦其名則仍爲中國辦事也此案赫德在總署糾纏已非一日經龔道商令改建鎮鄒海俚二島鄙見亦以爲然詎赫總司浮索多金力言不便總署無以難之祇得反



覆商榷仍從原議否則以東海關數年船鈔斷不敷兩處燈樓之需若常久不設又無詞以謝各國也官印租契無庸由稅司收執此係鴻章別開新樣冀得操縱由我卽執事不欲棄險於人之意諒龔道必能妥勸商辦將來成山扼要處所似宜不動聲色酌設防營起築礮臺萬一有事其地尙爲我用棋貴先著乞早留意卽如大沽礮臺之側崇地翁竟允稅司建燈樓弟加工改造礮臺而燈樓已不可去成山險處若有礮臺其餘任置燈樓彼亦奚能爲役耶粵東所製師船聞甚精堅其礮卽可酌移數尊爲礮臺之用華船終不敵洋船移置臺壘較爲穩妥治河覆疏大局攸關不敢專爲東人與執事現處地位有別耶鉅民遠不如官工之堅厚實屬可虞似不可不籌動庫款大加培築聞司庫存項尙多儻蒙覈實勘估酌量提撥爲曹濟諸州造福匪淺喬鶴翁函稱擬俟曹隄定議亦請撥款接築蘭儀東明長隄民力太窮礙難借助卽勉強捐辦決不足以持久東明

岳辛莊本近河心埵極卑薄無怪漫決波及東境漫水南趨尙不至南陽湖否想蓋籌周詳必能設法挽救也此間積水瀰漫災區亦廣 聖恩特撥巨款恐難應手徒爲疚心

復喬鶴儕河帥

聞考東長築隄一節尊意視東省爲動靜極得機要鴻章前奏本以曹鄆爲最喫緊不覺語重心長蓋東境民埵若加堅厚大汎怒漲下游無可恣洩銅瓦廂口門迤東而北勢必摧塌漫溢甚或至於奪溜分流督河與司地方者皆不能辭其責而西岸長垣境內有四年所築堤埵六十餘里開州境內有古金堤一道均尙寬厚但隨時修補殘缺可資抵禦惟東岸平衍一無遮欄終屬可虞前派員逐處諮訪輿情亦甚望長堤之成隄外田廬可永保護也昨丁稚翁來函擬於安瀾後酌度興築據稱鄆曹綿長二百數十里工鉅費煩民力拮据籌款不易又謂呂仲剛屯等處漫決實由

東明岳辛莊等民挖漫過橫溢是水勢一大上下游均同喫重鴻章覆以  
司庫存項尙多請其酌量提撥加工爲曹濟諸州造福不必專資民力未  
知肯采納否如果東省剋期動帑加築鄙意東長至蘭境西岸尙可暫緩  
由丈遴派妥員切實履勘東岸形勢工段核估須銀若干請撥協款約計  
一百數十里或不必如東南河老堤之寬高亦自可禦漫水爲數當不甚  
多摺內聲明東堤成後經過數汎察看水勢若果西滾必須另築堤埝再  
行奏辦款項既可周轉事機亦不致誤至隄成後能否移蘭儀以下乾河  
廳汛改駐脩守諸從簡易之處均請執事主持裁辦距豫既近東河應管  
之事諒無推諉東長距直省遙遠聲教幾至不通官民勤惰頗難考察前  
建議時固已斟酌及之仰蒙虛懷下問敢竭芻蕘之愚以備采擇永定河  
身積沙如山高於平地數丈兩堤又係純沙築成一冲卽潰姪故深知沙  
堤之不可恃潘季馴謂築堤束水攻沙必得真土老土殊爲確論妄議霍

家橋一帶不可築隄殆有鑒於此也議者多謂永定或於南北加築一堤近京田廬墳墓豈容侵占費帑至巨弭患亦不過二十年從前屢改中泓下口今復如此何敢力主斯論承詢附及

八月十日復陳荔秋比部

古巴祕魯等處招雇粵人凌虐受苦各國皆知祕魯較古巴尤甚祕魯在南花旗之南海邊由古巴往彼處搭坐輪車火船約十餘日可到若遇有便人乞探詢如何凌虐華工情形據所見聞詳確開示爲幸祕使已與東洋定約云卽來津商辦總署屬令將從前招去華民釋回言明嗣後不准招工方與立約自係正辦惟駐京英美各使明知其刻待華工又從旁爲之緩頰祕使復稱現立新章待華工十分滿足絕不肯自認凌虐弟等必力與辨駁如得執事查訪古巴之暇兼能偵實祕魯現在情狀亦足關其口而奪之氣也尙希與純甫等密爲留心察訪但勿以影響臆度之詞轉

難折服至古巴哈瓦那既駐有日國官員閣下前往應否必須會晤自可相機酌辦西國風俗向不藐視華官威使狡黠習知漢官威儀該處洋官豈能盡悉總署接弟信後亦必知會各使可無疑慮惟閣下在外辦事輕重緩急自有權宜鄙人無不竭力襄助聞古巴水土甚惡須到彼處三日後不生病可保平順祈慎重幸甚

九月二十日復鮑華潭中丞

固關稅務司鎮覆議軟駭照舊不收硬駭自須照加無須另議定章該稅向歸綠營收繳匪自今始文員往查仍不能改令文員抽收也執事應飭該州牧幫同照料勿任藉詞阻惑爲幸宣大調往巴哈臺之兵部議令由晉省籌給行餉宣化實無兵可撥恐尊處亦無餉可撥耳晉中煤鐵礦產甚多行銷亦遠是否定有收釐章程若用西洋機器挖取鎔鍊足可推行於通商口岸及各路製造局與洋煤洋鐵相埒大利所在地不愛寶而取

用無窮中土罕有知其理者公益留意毋汲汲憂貧也

十月某日復王雙石中丞

承平無事時河弊漕弊陳陳相因一漏卮一蠹藪也天忽令黃河北徙使數百年積弊掃而空之此乃國家之福人又欲逞其穿鑿之智於無事後求有事不知從前辦河漕時並無洋務今洋務繁興急而且鉅盍不移辦河辦漕之財力精力以逐漸經營爲中華延數百年之命脈耶公具大聰明敢以相質

十月二十二日復馮景亭寶允

接奉手示於河復故道一事原始要終崇論閎議發前人之所未盡發言衆人之所不能言想見憂國救民之誠豈惟鴻章得所就正昭若發蒙將使千百世後疑案復明浮議全息先生之功當不再下矣此後獻策者甚多無如卓見之切實精深自緣學識淺深高下之別鄙疏獨采用緒論

海內知交咸相推服然鴻章必歸美於先生不敢掠爲己有也頃晤令親  
王君知舊疴頗發氣體消癯而著述探討之勤窮年不輟尙宜節宣慎護  
以娛頽齡曷任企祝鴻章蒞直三年迭被水患扶傷救斃力竭心疲北河  
廢壞因循莫可救藥邇來伏秋雨勢有似南中黃梅節候而吳越皖楚乃  
又苦旱天意殊未可知部議河運仍不可廢采買更不准行大都敷衍目  
前不謀久遠京通錮弊愈窮愈深海運較省而猶以爲不便名曰欲復河  
運實則欲復其弊上下可交征利也能勿慨然北方稻田言者極衆必先  
籌巨款移南民而爲之農事而涉手官吏亦終無成故自元以來迄無明  
效鄙意擬督防軍試辦一二但不可久耳損齋兄屬聯額附呈

十一月九日復邵汴生中丞

肅州之捷首從悍逆殲除甚多邊塞肅清轄疆從此可登衽席季帥艱苦  
經營煞費心力金甌竟卜開我朝二百餘年未有之奇信乎非常之功

必待非常之人矣部撥甘餉百萬加以各省添撥之數計可略敷年終賞犒哈密漢城聞已失陷金張各軍轉運一時諒難就緒而關外又成燎原之勢從容籌畫須明年春夏乃可次第出塞耳子務急欲歸葬自係人子至情台端准假兩月而未允其終制實爲仁至義盡正與鄙見相符銘軍暫交子徵代統當可妥協將來留防抽撤皆須子務回營後相機酌辦俾專責成甘軍想徐議凱撤歸並欠餉太巨難保不滋事端陝防鎮攝亦甚要緊容卽裁屬子務事竣早日回營望尊處屆時敦趣之爲幸直屬連年大水堵潰賑荒筋疲力瘁邇來積潦已漸消退各河廢壞年久苦無鉅貲浚築若兩少又慮旱災眞令司牧爲難四方甫定而土木游觀之工紛然並舉民力幾何徒增憂喟

十一月十一日復張振軒中丞

徐仁山稟稱赴蘇謁商已蒙飭滬局籌湊淮餉十二關曷勝組感芝田荷



可設法諒無不盡力也東省河堤又撥蘇釐誠恐應接不暇祇可斟酌勻付惟我軍來源專指吳中不得不爲盡歡竭忠之請招商輪船已撥采買米石足徵惠顧大局盛道等昨請分撥正供二成似亦正辦蘇省印委無不爲沙船說項究其隱情沙船實已減少大都狠劣紳董把持豈知輪船之興關係國計民生久遠耶聞敏齋有籌撥關局閒款發招商局生息之說此事於公有益於衆商有裨鴻章若在江南必早行之閣下何不決斷延樹翁奉諱而南漕逕運已成鐵案坐糧廳所議各條多難遵照口袋一事蘇力恐來不及茂文如何籌商念念園工聞須推廣捐助勢將及於京外官亦斷湊辦不足文相日內還朝未知能設法阻延否分閩之舉皖南不盡謂然蘇捐十萬果應手否聞左帥現請陝甘分閩隴人已湊三十萬皖則無此豪舉也

十一月十三日復劉仲良方伯

江省丁漕部議仍改征錢似可無甚變更十三年全征本色起運萬做不到然須稍爲通融鄙人前議請酌征本色亦明知不能行而附片專重采買起運謂當就漕折漕項本款籌辦不足則另提開款津貼無論起運多少必可設法部議駁采買而僅令酌征本色起運江廣各省勢皆難行湖北漕數極少可常折征江西漕多若壹意堅執無顆粒到京倉旣非公忠體國之道終必有變本加厲之時諸當事現正得人海內肅清不及此時酌籌變通辦法而專待河運可復漕船可行明是推諉鄙見百年以內無能復河運之理矣招商輪船實爲開辦洋務四十年來最得手文字兄創辦之始卽藉運漕爲詞各國無不驚服謂中國第一好事現僅分運蘇浙漕米歲二十萬石沾潤較少製輪船僅五隻猶可運米三十萬若運米漸增添船漸多國計民生均大有裨委員四人朱道其昂盛道宣懷管理招商運米各事唐丞廷樞徐郎中潤管理輪船攬載各事皆熟習生

意殷實明幹兄所次第委派者朱雲甫承運浙漕十餘年條理極精杏孫現爲蘇省包辦采買京米六萬石利病周知尊處函詢二君當易就理茲先將來單所詢就鄙人畧知者逐條簽往並查開雲甫前擬采買章程核減用款一摺蘇浙采買舊案報銷各款兩摺現議由津巡運通壩浙糧道及坐糧廳各議章程兩摺附呈閱核雖臨事有須酌量更變之處大要規模不出乎此米價一層隨時隨地互易江西或自在本地採購或交商局代購時價難準約計購運交兌公私雜費至多不過如江浙采買每石二兩五六錢少則每石二兩一二錢仿江北運漕例折征於民辦運於官先期奏明 廷議當准行也

十一月十五日復丁稚璜宮保

昨奉初二日咨臧以查明東明石莊戶決口甚寬黃水南注東境受害亟須設法堵築以便下游接築長隄並蒙垂念直省窘乏無可設措允由東

省籌撥銀十萬兩上下以資貼補工料卽由東委員督辦等因仰見蓋畫公忠體恤備至感佩莫名當卽轉行道縣據實咨覆請主持飭遵在案查東明爲直境極邊又孤縣河東相距過遠前迭飭查該縣初則含混飾抵繼乃僅稱岳辛莊石莊戶一帶民埝皆漫溢水中亦未聲明決口寬深丈尺殊堪痛恨而喬河帥親往查勘奏稱直境堤工可緩水患全在東境必須築隄似若相爲印證尤不可解矣茲既據尊處遴派熟悉河工委員再四履勘自係確實情形石莊戶決口寬雖百四十餘丈中洪深僅八尺近岸五六尺僅分黃溜十分之四誠如臨清葛牧所稟由口門東南逐漸下埽立腳節節做去尙非不能堵築惟查閱來圖石莊戶對面河心有乾灘一片葛牧稟云中隔夾灘一道如將來口門收窄時大溜擡高逼歸正河此灘是否無礙能否得吸川之勢是在督辦委員臨時相度妥辦耳至夫工借資民力一層上年執事侯工築埝借助民夫雖不免怨咨賴有大才

在工主持督率幸得疏役聞荷濮東明被水淹浸已久逃亡既多未回民  
力亦甚拮据其去河較遠不受河患卽堵築亦不受益者又難踴躍從事  
惟目下經費竭蹶舍此實無法籌辦姑就來咨檄飭該地方官紳竭力勸  
諭荷澤之民果能越境助役自不容東明稍有推諉也惟是直省之窮甲  
天下積年水災羅掘敷衍到處告罄情非得已焉有餘力能助此工此執  
事所洞鑒今蒙慨發十萬金巨款以決口水勢情形計之但使承辦得人  
集料鳩工可了斯役或不在民夫助力之多寡大名恩道及東明唐令於  
河務工程全未閱歷祇可幫同勸紳督夫其一切工務機宜仰懇籌派東  
省熟悉工程核實辦事大員主持其事曷任拜禱再查石莊戶一帶距河  
逼近決口不可不堵堵口後接築長隄下至侯林似須展開地步擇高處  
爲之免再沖潰更祈高明覈奪實夫漕帥計日履新遵守齋規定無異議  
乞先轉致鄙忱爲荷

十一月十六日復彭雪琴宮保

浙中人來詢知西湖三潭印月茆庵結構清遠先生終日鍵戶畫梅江山清福惟神仙中人英雄退步始能獨占下視我輩陷入泥塗如醉如夢者不知幾時可醒耳丁漣甫阿膠方劑能療公疾而不自療足見非盡阿膠之力乃湖上逍遙散之功也兩年一住已成例案願來往千百年異日鄙人尙可躡躡從之承示水師訓條刊本切實正大使人人熟讀力行當不致傳染壞習與吾能認真整飭亦殊可喜聞近來江船屢有誘賭局騙圖財害民之案雖經各處破獲嚴辦不少若自水師清源除害力量尙可做到商旅受惠匪淺經大蘇周厯重懲數回計亦絕迹幸勿稍避嫌怨長江輪舶橫行價賤行速民船生意日稀凋零日甚儻能長保平穩或冀敲魚不盡入淵叢也慎隴先後報捷腹地幸已肅清惟已遣弁勇未撤營頭無一善後安插之方人心難平隱患極鉅不待水旱災厲而時虞其竊

發若有事變能母岌岌弟蒞直三年迭遭水患補苴罅漏竭蹶弗遑自愧才力薄弱終有貽誤之日受 恩過重不敢言退徒自廩廩春間 陵差幸而無過明年二月又須恭辦 西陵大差此事停止已十八年道路橋梁全行冲塌一旦重新修整民力已窮遑論其他羈官邊遠老母不得侍養舍幼弟尙知自好盛年捐館徒傷慈懷前顧後慮往往百感交集無可告慰來春仍當出江望勿過勞心動氣少作應酬筆墨公暇徜徉風月以娛暮景千萬慎護不宣

十二月九日復李兩亭制軍

俊侯前有全軍則來否則中止之約將領多不欲分軍況做工尤在人衆若留步隊五營來者亦形單薄是以暫作罷論 寄諭鈔示岑彥卿疏不知滇中情形與各省迥異滇兵全未募補滇勇全係鄉民改勇爲兵尙易料理各省兵已及額豈能安插散勇且彼省之勇斷不能充此省之兵卽

使補兵又豈足臨大敵岑說果行亂不旋踵勢將束手待斃惟求逐漸裁減逐漸安插之法然就時局人心而論十年以內防營尙未可廢卓見以爲何如恬吉輪船補還捕盜局藉省餉自是正辦五六號大兵船費用殊鉅未知二成洋稅可勉支否鄙意如入不敷出六號成後姑停造船俟積有餘款再作後圖閩廠現籌歲造兩船若招商局不能多領尙慮無處消納上海局面更狹矣敝處久未調用滬局礮火儘可飭歸江省應用甯局大礮一項專指爲大沽礮臺之需其小礮亦可由尊處商調也津機器局報銷向歸戶工部核覆兩處索費過重今夏曾屬朱虞二君另覓門徑乃有巡飭水部再由彼知照農曹之說聞閩廠現辦銷事牽掣殊多尙未知下文分解滬局亦係巨款無論如何辦法必須及時籌提銷費專人料理幸勿忽置祇要辦出首案以後便可照章勉林廢棄實爲可惜昨方緘勸其俯就體羅勿太決絕請公設法羈縻將來滬津機器局欲求替人無



諭此君凌彼南艱苦相從已將十載耿介枯寂洋務文字得未曾有穀翁  
曾委權鹽道不諧於俗文正師遂與若合若離念其老且貧區區薪貲不  
足自贍能否擇宜加一例差以贍之感感世香憔悴沈毅拔署糧篆洵稱  
得人將來能卽真除否此間冬月初十日得雪四寸而近京尙未優霑來  
春 大差供億諸形竭蹶水旱徭役窮苦奔波於事何裨徒增愧疚

十二月十日復船政大臣沈幼丹中丞

船廠善後事宜接總署咨函備聆大略前迭飭上海局員唐丞廷樞赴閩  
稟商以事牽綴聞冬月杪始附輪舟南去十三四等號是否合用果否承  
領並租費若干減價保險若干經執事面爲指示當有端倪弟方照鈔總  
署函令該局妥籌議覆計唐丞回滬與各同事商定後據實稟聞乃可徐  
議覆奏總署極盼商局租領惟商本未甚充拓漕糧未能添裝該局員董  
似尙未敢放手大做數年後生意日盛或不慮歲造船隻無消納處也商

局顧傾似可兼用閩局人駕駛較爲省費順手景星諒已商及敝處亦曾  
懇懇恐伊等疑慮多端請公切實開導之左帥餉鹽之議未知其詳若運  
淮鹽必無成議淮鹽歲銷無幾滯在銷而不急在運耳分遣學生赴英法  
學習造船駛船之法用意極爲深遠總署欲令中國委員管帶操縱自易  
而並不計及得力與否亦非篤論閣下既與日意格堅明約束是否議有  
規條應否另派廠內與日意格素習之委員同往學習經費擬由何處籌  
提敬祈詳晰示知滬局赴美子弟雖經曾文正商派陳荔秋容尊甫二人  
帶往荔秋品學極佳而人地生疎專恃尊甫爲目蝦每有老倦思歸之意  
一時竟無替手出洋久住先須熟習外邦語言文字然後動中窾要日意  
格久充總理若副以素不相習之華員必致鑿枘若徒委中國學生於外  
人之手又恐遠久或有格礙想大才必有妥策望熟籌見示爲幸若須派  
委應請由尊處籌度呼應較靈總署諒已併致台端茲更將來函鈔呈電

察此間多雪未甚霑足地方尙託芑平靜來春 西陵大差奔走供應竭  
蹶倍甚

十二月十七日復朱修伯宗丞

自星叔出使後 樞垣襄助需才僂指計之無如執事深明大略肆應不  
窮者已隴事幸已告蒧 廟謨以金張宋諸軍西上自是一時健將宋軍  
在肅與左相不協本已撤回涼州駝馬餉運毫未預備方專弁來保乞爲  
設法適奉 明詔出關知難中止迭函諄勸整理一切惟求左帥代陳大  
略稍緩師期當可陸續進發三將尙能同心協力但冀各路將帥和衷共  
濟勿求速效或終有成耳畿境屢歉之餘事事棘手經營竭蹶愧疚殊多  
園工需費過鉅雖無能緩之機似無可成之理日來科場案小有風波  
羣公衮衮想喬遷卽在目前若升轉上堂多一能言解事之人中外之福  
也

十二月二十一日致曾劄剛通侯

兆域既定明春必應及時營葬計夏季卽已釋服入都謝恩極是正理  
聞民爵可歸散秩大臣班內惟吾師中興元勳執事清才雅望眷禮諒  
必加隆或蒙賞予京卿當不遽投閒散也雙聲疊韻之法竟通於泰西  
語言文字之根將來閩滬機器船廠能爲親歷指授考訂似性學均屬相  
近中土人才多空談學問仕宦於此道漫不究心故洋務都無長進深心  
遠識者宜別有所嚮也敝處無甚新書奇器但微明自照略知其意而已  
霞翁殂謝光復已出望外論其勳階應有諡號新例過嚴非人能請左公  
竟得破天荒相公雖有志節亦是命運湘才如左者豈少哉鄙狀碌碌如  
昔蒞直四載贏得鬚髮皆霜長此終古殆未可知昨王益吾太史寄來史  
館所撰先師傳稿似甚詳覈特鈔呈

元日致宋雪帆侍郎

同治十三年

楚北第七起軍需報銷業經覆准仰承關注感佩莫名惟敝處淮軍九十  
兩年銷案閱農司全換生手例案不甚諳習致有意外挑駁卽如柴草一  
項自四年剿捻後定章核給七八年來兵民到處相安毫無騷擾聲名率  
由於此每營按年僅添銀一千餘兩糜餉無幾而民間不受苛派擾掠之  
害保全實多在部中彙總報銷似覺積成巨數究未曾分年分營細核也  
曾文正極知此事有益是以議改直隸練軍章程特加此項其時部議亦  
謂免致騷擾百姓外間皆服其明允豈前日之部友尙慮及騷擾百姓今  
日之部臣獨不慮騷擾前日之弁兵因加給此項而得免騷擾今日之弁  
兵停止此項而能無騷擾乎此尤事理之彰明較著者矣況淮軍初案部  
議本有各路軍營不得援以爲例之說今忽翻前案謂各路俱無此項報  
銷而直省練軍已核准報銷六七次者竟置不論若執此相爭尙復成何  
事體耶侍驛聞其事不覺寒心儻年內尙未出奏務祈執事力爲緩頰從

中調停免致徒滋筆舌洵爲大局之幸各堂多係舊識緣未知真確不敢遽上公函謹繕另緘奉呈督辦雖老前輩甫經入直或有不便明言力諍之處然事關公道似可參贊一一伏祈垂意

正月二十日復邵汴生中丞

尊示大局未定一年之內銘軍斷難輕議移紮擬今年備陳之想緣岑中丞撤勇爲兵之議而發也滇中兵額久懸又係土著之勇與他省情形迥異且兵額無幾其能安插如許之勇耶惟敝部供支久形竭蹶欲俟子務過津面商將來減撤之計卽到乾少遲似尙無妨可紓蓋慮

正月二十八日復李兩亭制軍

大疏詳陳改勇爲兵及驟議遣撤窒礙情形簡練名貴足破羣疑樞部諸公未歷艱危險阻之狀頓忘遠慮隱患之萌欲速見小空談無補外間若再隨聲附和潰決卽在目前防勇較多省分似以陝甘雲貴爲最其次則

江直略等銘軍在乾州者邵汴翁諱懇留鎮一年再行商辦唐軍在徐似是閒著惟東境黃隄不塞年年漫水下溢無可疏堵曹徐民氣剛勁久災盜劫必生宋代黃河南北分流是以釀出梁山泊宋江一輩此可憂之甚者其他伏莽游匪尙不暇計無已或如尊指徐議裁減一二成可乎畿輔重地則尙不敢輕減故前案亦尙未遑議覆總之大亂以後仍欲守天下以兵直同冒警試問咸豐以後除東三省馬隊外果有一處可用之兵乎懲羹而并不吹蠶書生不知執政亦不知耶不變兵制竊謂繼今以往營伍竟無用處今舉朝無不以復舊制爲言於兵事亦仍舊章是促之危亡耳現計各省歲入不下五千萬而府庫虛耗若此防剿各軍約費二千萬內外然不有防軍則斷不得平靖此五千萬亦無出處新疆用兵自古最稱煩費今欲大舉而防餉既不能損征餉又必須增已爲兩窮之道加以內府供億徵求愈出愈多方事事開拓豈有整頓撙節之時實深惴懼

我輩受 國厚恩義未可以言去祇有竭力支持盡心所事而已籌議輪船函稿似係彼南手筆亦屬推闡盡致將來盛道等赴閩籌商領船定議當會台銜覆奏滙廠銷費關道應可設籌竹儒有帶六號兵船往海外之議未便遽行

二月二日復邵汴生中丞

穆左久不相洽自籌轉運又令遣散所部勢難遠行此事大費調處關外大舉本無此財力應先議食後議兵 中旨調發過驛祇可張虛聲而未可以程實效季帥強弩之末仍責以重遠不免觀望徘徊然又未便令他入爲之也尊慮不敢作已治已安之想洵爲老謀深識銘軍目前須暫留鎮俟出關諸軍腳步稍穩後路裁遣稍有就緒再行調撤未爲不可惟議者總謂腹地肅清正當裁勇節餉鄙人豈能獨負重累俟子務過津時與之妥籌大略岑中丞之議逢迎激射斷不能行



三月三十日致船政大臣沈幼丹中丞

二月初間杏蓀觀察寄到上元手示籌畫精詳時方入都展 觀隨屆將函摺轉交經筵同年督閱並代呈邸帥僉以出洋學習造船駛船一節應由執事主持覈辦決不稍有牽掣至養船及出洋經費不敷尙冀鄙議裁撤師船以養輪船旦夕可行陸續勻撥經筵謂或由總署 奏辦或由外間疏催若海防無事似可從容籌度亦慮江廣各當事未能實力遵辦也今日本忽有興兵臺灣之說大燾既須先其所急整輪巡行各省更易藉詞延誤欲指抽撤水師分養輪船竟無歲月可俟日意格昨來津謁晤感激恩知亟圖報効因船差已竣擬在上海候信弟知閣下必有澎臺之役屬令赴閩靜候指揮無須引避日意格曾充法國兵官於師船戰法外交機宜均所深悉儻已回廠或可有裨高深商船兵船間造以資商局領用無庸租價保險悉如尊指惟開機器費煤海鏡昨運漕來津不得進大沽

口俟唐景星盛杏蓀夏間到津議定大略再行會奏津局習槍礮工匠子弟若能赴布廠游學自易精進苦於無人帶往無款接濟電報費巨駭俗亦愧有志未逮

李文忠公朋僚函稿卷十五終